

庫文有萬

種一千集一第


編主五雲王

集坡東蘇

(七)

著 軾 蘇

行發館書印務商



蘇東坡集

(七)

蘇軾著

國學基本叢書

蘇東坡集後集

卷一

詩六十四首

次韻劉景文西湖席上

二老長身屹兩峯，常撞大呂應黃鍾。
將辭鄴下劉公幹，却見雲間陸士龍。
白髮憐君略相似，青山許我定相從。
吾今官已六百石，慚愧當年邴曼容。

次前韻答馬忠玉

坡陀巨麓起連峯，積累當年慶自鍾。
靈運子孫俱得鳳，慈明兄弟孰非龍。
河梁會作看雲別，詩社何妨載酒從。
祇有西湖似西子，故應宛轉爲君容。

予去杭十六年而復來留二年而去，平生自覺出處老少粗似樂天，雖才名相遠而安分寡求亦庶幾焉。三月六日來別南北山諸道人而下天竺，惠淨師以醜石贈行，作三絕句。

當年衫鬢兩青青，強說重臨慰別情。
衰髮祇今無可白，故應相對話來生。
出處依稀似樂天，敢將衰朽較前賢。
便從洛社休官去，猶有閑居二十年。
在郡依前六百日，山中不記幾回來。
還將天竺一峯去，欲把雲根到處栽。

次韻答黃安中兼簡林子中

老去心灰不復然。一麾江海意方堅。那堪黃散付子度。空羨杭蘇養樂天。病肺一春難白酒。別腸三夜遼朱絃。羣仙政欲吾歸去。共把清風借玉川。

留別塞道士拱辰

黑月在濁水。何曾不清明。寸田滿荆棘。梨棗無從生。何時反吾真。歲月今峥嵘。屢接方外士。早知俗緣輕。庚桑託雞鵠。未肯化南榮。晚識此道師。似有宿世情。笑指北山雲。訶我不歸耕。仙人漢陰馬微服。方地行咫尺。不往見煩子。通姓名。願持空手去。獨控橫江鯨。

次韻子由書王晉卿畫山水二首

老去君空見畫。夢中我亦曾遊。桃源縱落誰見。水到人間伏流。山人昔與雲俱出。俗駕今隨水不回。賴我胸中有佳處。一樽時對畫圖開。

又書王晉卿畫四首

山陰陳迹

當年不識此清真。強把先生擬季倫。等是人間一陳迹。聚蚊金谷本何人。

雪谿乘興

谿山雪月兩佳哉。賓主談鋒夜轉雷。猶言不見戴安道。爲問適從何處來。

四明狂客

毫端偶集一微塵。何處谿山非此身。狂客思歸便歸去。更求敕賜枉天真。

西塞風雨

斜風細雨到來時。我本無家何處歸。仰看雲天真蒻笠。旋收江海入蓑衣。

破琴詩并引

舊說房琯開元中嘗宰盧氏與道士邢和璞出游過夏口村入廢佛寺坐古松下和璞使人鑿地得舊中所藏婁師德與永禪師書笑謂琯曰頗憶此耶琯因悵然悟前生之爲永師也故人柳子玉寶此畫云是唐本宋復古所臨者元祐六年三月十九日予自杭州還朝宿吳松江夢長老仲殊挾琴過予彈之有異聲就視琴頗損而有十三絃予方歎惜不已殊曰雖損尚可修曰柰十二絃何殊不答誦詩云度數形名本偶然破琴今有十三絃此生若遇邢和璞方信秦箏是響泉予夢中了然識其所謂旣覺而忘之明日晝寢復夢殊來理前語再誦其詩方驚覺而殊適至意其非夢也問之殊蓋不知是歲六月見子玉之子子文京師求得其畫乃作詩并書所夢其上子玉名瑾善作詩及行草書復古名迪畫山水草木蓋妙絕一時仲殊本書生棄家學佛通脫無所着皆奇士也

破琴雖未修中有琴意足誰云十三絃音節如佩玉新琴空高張絲聲不附木宛然七絃箏動與世好逐陋矣房次律因循墮流俗懸知董庭蘭不識無絃曲

題王晉卿畫後

醜石半蹲山下虎長松倒臥水中龍試君眼力看多少數到雲峯第幾重

聽武道士彈賀若

清風終日自開簾涼月今宵肯挂簷琴裏若能知賀若詩中定合愛陶潛。

元祐六年六月自杭州召還汝公館我於東堂閱舊詩卷次諸公韻三首

半熟黃梁日未斜玉堂陰合手栽花却尋三十年前味未飯鍾聲已飯茶
夢覺還驚屢響廊故人來炷影前香鬢鬚白盡成何事一帖空存老遂良法帖中有褚遂良書云卽日遂良鬚髮盡白

尺一東來喚我歸衰年已迫故山期文章曹植今堪笑却卷波瀾入小詩

次韻子由書王晉卿畫山水一首而晉卿和二首

誤點故教同子敬雜篇真欲擬湯休壠雲寄我山中信雪月追君溪上舟會看飛僊虎頭篋却來顛倒拾遺裘子美詩云天吳與紫鳳顛倒在短褐王孫辨作玄真子細雨斜風不濕鷗

此境眼前聊妄想幾人林下是真休我今心似一潭月君已身如萬斛舟看畫題詩雙鶴鬢歸田送老一羊裘明年兼與士龍去萬頃蒼波沒兩鷗

感舊詩并引

嘉祐中予與子由同舉制策寓居懷遠驛時年二十六而子由二十三耳一日秋風起雨作中夜翛然始有感慨離合之意自爾宦游四方不相見者十常七八每夏秋之交風雨作木落草衰輒悽然有此感蓋三十年矣元豐中謫居黃岡而子由亦貶筠州嘗作詩以記其事元祐六年予自杭州召還寓居子由東府數月復出領汝陰時予年五十六矣乃作詩留別子由而去床頭枕馳道雙闕夜未央車轂鳴枕中客夢安得長新秋入梧葉風雨驚洞房獨行殘月影悵焉感初涼

筮仕記懷遠謫居念黃岡。一往三十年。此懷未始忘。扣門呼阿同。子由一字同叔。安寢已太康。青山映華髮。歸計三月糧。我欲自汝陰。徑上潼江岸。想見冰槃中。石蜜與柿霜。予欲請東川而歸。二物皆東川所出。憐子遇明主。憂患已再嘗。報國何時畢。我心久已降。

西湖秋涸東池魚窘甚。因會客呼網師遷之西池。爲一笑之樂。夜歸被酒不能寐。戲作放魚一首。東池浮萍半粘塊。裂碧跳青出魚背。西池秋水尙涵空。舞闊搖深吹荇帶。吾僚有意爲遷居。老守縱饑那忍膾。縱橫爭看銀刀出。灑潛初驚玉花碎。但愁數罟損鱗鬚。未信長堤隔濤瀨。濺濺發發須臾間。圉圉洋洋尋丈外。安知中無蛟龍種。尙恐或有風雲會。明年春水漲西湖。好去相忘渺淮海。

復次放魚前韻答趙承議陳教授

擾擾萬生同大塊。捨榆不羨培風背。青丘已吞雲夢芥。黃河復繚天門帶。長譏韓子隘且陋。一飽鯨魚何足臉。東坡也是可憐人。披抉泥沙收細碎。逝將歸修八節灘。又欲往釣七里瀨。正似此魚逃網中。未與造物游數外。且將新句調二子。湖上秋高風月會。爲君更喚木腸兒。脚扣兩舷歌小海。

九月十五日觀月聽琴西湖一首示坐客

白露下衆草。碧空卷微雲。孤光爲誰來。似爲我與君。水天浮四坐。河漢落酒樽。使我冰雪腸。不受麴蘖醺。尙恨琴有絃。出魚亂湖紋。哀彈本舊曲。妙耳非昔聞。良時失俯仰。此見寧朝昏。懸知一生中。道眼無由渾。復次前韻謝趙景覘陳履常見和兼簡歐叔弼兄弟

能詩李長吉。識字揚子雲。端能望此府。坐歛獲兩君。逝將江湖去。浮我五石樽。眷焉復少留。尙爲世所醺。

或勸莫作詩兒輩工織紋朱絃寄三歎未害俗耳聞共尋兩歐陽伐薪照黃昏是家有甘井汲多終不渾

送歐陽主簿赴官韋城四首

鳳雛驥子日相高白髮蒼顏笑我曹讀遍牙籤三萬軸却來小邑試牛刀
出處年來恨不齊一樽臨水記分攜江湖咫尺吾將老汝穎東流子却西
白馬津頭春水來白魚猶喜似江淮使君已復冰堂酒更勸重新畫舫齋
道傍垂白定沾巾正似當年綠髮新故國依然喬木在典型復見老成人

泛穎

我性喜臨水得穎意甚奇到官十日來九日河之湄吏民笑相語使君老而癡使君實不癡流水有令姿
遶郡十餘里不駛亦不遲上流直而清下流曲而漪畫船俯明鏡笑問汝爲誰忽然生鱗甲亂我須與眉
散爲百東坡頃刻復在茲此豈水薄相與我相娛嬉聲色與臭味顛倒眩小兒等是兒戲物水中少磷淄
趙陳兩歐陽同參天人師觀妙各有得其賦泛穎詩

六觀堂老人草書詩

物生有象象乃滋夢幻無根成斯須方其夢時了非無泡影一失俯仰殊清露未晞電已徂此滅滅盡乃
真吾云如死灰實不枯逢場作戲三昧俱化身爲醫忘其軀草書非學聊自娛落筆已喚周越奴蒼鼠奮
鬚飲松腴剝藤玉板開雪膚遊龍天飛萬人呼莫作羞澀羊氏姝六觀取金剛經夢幻等六物也老人惜
丁性精於醫而善草書下筆有遠韻而人莫知貴故作此詩

次韻劉景文見寄

淮上東來雙鯉魚。巧將詩信渡江湖。細看落墨皆松瘦。想見掀髯正鶴孤。烈士家風安用此。書生習氣未能無。莫因老驥思千里。醉後哀歌缺唾壺。

次韻趙景貺督兩歐陽詩破陳酒戒

商也哀未散。歲月忽已秋。祥琴雖未調。餘悲不敢留。矧此乃韻語。未入金石流。義之生五之。總角出銀鉤。吾家有二許。下筆兩不休。君言不能詩。此語人信不。千鍾斯爲堯。百榼斯爲丘。陋矣陶士衡。當以太白浮。酒中那有失。醉則不驚鴟。明當罰二子。已洗兩玉舟。

叔弼云履常不飲故不作詩勸履常飲

我本畏酒人。臨觴未常訴。平生坐詩窮。得句忍不吐。吐酒茹好詩。肝胃生滓汙。用此較得喪。天豈不足付。吾儕非二物。歲月誰與度。悄焉得長愁。爲計已大誤。二歐非無詩。恨子不飲故。強爲酬一酌。將非作愁具。成言如皎日。援筆當自賦。他年五君詠山王。一時數。

臂痛謁告作三絕句示四君子

公退清閑如致仕。酒餘歡適似還鄉。不妨更有安心病。臥看繁縝一炷香。心有何求遣病安。年來古井不生瀾。祇愁戲瓦閑童子。却作泠泠一水看。小閣低窗臥晏溫。了然非默亦非言。維摩示病吾真病。誰識東坡不二門。

到穎未幾公帑已竭齋廚索然戲作數句

我昔在東武，吏方謹新書。齋空不知春，客至先愁予。
采杞聊自誑，食菊不敢餘。歲月今幾何，齒髮日向疎。
幸此一郡老，依然十年初。夢飲本來空，真飽竟亦虛。
尚有赤脚婢，能烹頰尾魚。心知皆夢耳，慎勿歌歸歟。

景覶履常屢有詩督叔弼季默唱和已許諾矣復以此句挑之

君家文律冠西京，旋築詩壇按酒兵袖手。莫輕真將種，致師須得老門生。
明朝鄭伯降誰受，昨夜條侯壁已驚。從此醉翁天下樂，還應一舉百觴傾。
文忠公贈蘇梅詩云：我亦願助勇，鼓旗譟其旁。快哉天下樂，一
醻宜百觴。

贈月長老

天形倚一笠，地水轉兩輪。五霸之所連，毫端栖一塵。
功名半幅紙，兒女浪苦辛。子有折足鎗，中容五合陳。
十年此中過，却是英特人。延我地爐坐，語軟意甚真。
白灰如積雪，中有紅駒驥。勿觸紅駒驥，作灰維那嗔。
拱手但默坐，牆壁方諄諄。今宵恨客多，汙子白鬚巾。
後夜當獨來，不煩主與賓。蒲團坐紙帳，自要觀我身。

次韻答錢穆父以軾得汝陰用杭越唱酬韻作詩見寄

大耿疲勞已離羣，小馮慈愛且當門。軾本以舍弟親嫌請郡玉堂不著扶犁手，霜鬢偏宜畫鹿幡。
豪傑雖無兩王繼，子直深父風流猶有二歐存。叔弼季默清詩已入新歌舞，要使邦人識雅言。

韓退之孟郊墓銘云：以昌其詩也。來詩下語未契作此答之。
昌身如飽腹，飽盡還當飢。昌詩如膏面，爲人作容姿。不如昌其氣，鬱鬱老不衰。雖云老不衰，劫壞安所之。
不如昌其志，志一氣自隨。養之塞天地，孟軻不吾欺。人言魏勃勇，股栗向小兒。何如魯連子，談笑却秦師。

慎勿怨謗讟。乃我得道資。淤泥生蓮華。糞壤出菌芝。賴此善知識。使我枯生荑。吾言豈須多。冷暖子自知。

送歐陽推官赴華州監酒

我觀文忠公。四子皆超越。仲也珠徑寸。照夜光如月。好詩真脫兔。下筆先落鵠。知音如周郎。議論亦英發。文章乃餘事。學道探玄窟。死爲長白主。名字書絳闕。熙寧之末。仲純父見僕於京城之東。曰。吾夢道士持告身授吾曰。上帝命汝爲長白山主。此何祥也。明年仲純父沒。傷心清顎尾已伴白鷗沒。喜見三少年。俱有千里骨。千里不難到。莫遣歷塊蹶。臨分出苦語。願子書之笏。

十月十四日以病在告獨酌一首

翠柏不知秋。空庭失搖落。幽人得佳蔭。露坐方獨酌。月華稍澄穆。霧氣尤清薄。小兒亦何知。相語翁正樂。銅爐燒柏子。石鼎煮山藥。一盃賞月露。萬象紛醡酢。此生獨何幸。風饗欣初泊。逝逃顏蹤網。行赴松喬約。莫嫌風有待。漫欲戲寥廓。泠然心境空。髣髴來笙鶴。

獨酌試藥玉滑璣。有懷諸君子。明日望夜月。庭佳景不可失。作詩招之。

鎔鉉煮白石。作玉真。自欺琢削爲酒盃。規摹定州瓷。荷心雖淺狹。鏡面良渺瀰。持此壽佳客。到手不容辭。曹侯天下平。定國豈其師。一飲至數石。溫克頗似之。風流越王孫。詩酒屢出奇。喜我有此客。玉盃不徒施。請君詰歐陳。問疾來何遲。呼兒掃月榭。扶病及良時。

歐季默以油煙墨二丸見餉。各長寸。許戲作小詩。

書窗拾輕煤。佛帳掃餘馥。辛勤破千夜。收此一寸玉。癡人畏老死。腐朽同草木。欲將東山松。涅盡南山竹。

墨堅人苦脆，未用歎不足。且當注蟲魚，莫草三千牘。

明日復以大魚爲餽，重二十斤，且求詩故復戲之。

漢庭九尺人，誰似老方朔。那將一寸金，令足三冬學。餉魚欲自洗，鱗尾光卓犖。我是騎鯨手，聊堪充鹿角。

和趙景貺栽檜

汝陰多老檜，處處屯蒼雲。地連丹砂井，物化青牛君。時有再生枝，穎之靈壇觀。亦有再生檜，還作左紐紋。王孫有古意，書室延清芬。應憐四孺子，不墮凡木羣。體備松柏姿，氣含芝朮薰。初扶鶴立骨，未出龍纏筋。巢根白蟻亂，網葉秋蟲紛。乃知蔽芾初，甚要封植勤。他年皮三寸，豈鼠了不聞。

葉待制求先墳永慕亭詩

靈區有異產，化國無潛珍。承平百年間，簪纓半齊民。建溪富奇偉，葉氏初隱淪。森然見喬木，其下維德人。佳哉鬱葱葱，氣若鳳與麟。聯翩出儒將，豈惟十朱輪。新松無鹿觸，舊柏有鳥馴。待公歸上冢，淚葉乃肯春。

與趙陳同過歐陽叔弼新治小齋戲作

江湖渺故國，風雨傾舊廬。東來三十年，愧此一束書。尺椽亦何有，而我常客居。羨君開此室，容膝真有餘。拊床琴動搖，弄筆窗明虛。時方禱雨龍祠作此句時，星斗燦然。四更風雨大至，明日乃雪。後夜龍作雨，天明雪填渠。夢回聞剝啄，誰乎趙陳子。添丁走沽酒，通德起挽蔬。主孟當唱我，玉麟金尾魚。一醉忘其家，此身自蘧蓀。

聚星堂雪并敍

元祐六年十一月一日，禱雨張龍公得小雪。與客會飲聚星堂。忽憶歐陽文忠公作守時，雪中約客賦詩。禁體物語。於艱難中特出奇麗。爾來四十餘年，莫有繼者。僕以老門生繼公後，雖不足追配先生，而賓客之美，殆不減當時。公之二子又適在郡，故輒舉前令各賦一篇。

窗前暗響鳴枯葉。龍公試手行初雪。映空先集疑有無。作態斜飛正愁絕。衆賓起舞風竹亂。老守先醉霜
松折。恨無翠袖點橫斜。祇有微燈照明滅。歸來尚喜更鼓暗。晨起不待鈴索掣。未嫌長夜作衣稜。却怕初
陽生眼纈。欲浮大白追餘賞。幸有回飈驚落屑。模糊檜頂獨多時。歷亂瓦溝裁一瞥。汝南先賢有故事。醉
翁詩話誰續說。當時號令君聽取。百戰不許持寸鐵。

歐陽叔弼見訪誦陶淵明事，歎其絕識。叔弼旣去，感慨不已，而賦此詩。

淵明求縣令，本緣食不足。東帶向督郵，小屈未爲辱。翻然賦歸去，豈不念窮獨。重以五斗米，折腰營口腹。
云何元相國，萬鍾不滿欲。胡椒銖兩多，安用八百斛。以此殺其身，何翅抵鵲玉。往者不可悔，吾其反自燭。

喜劉景文至

天明小兒更平傳呼。髯劉已到城南隅。尺書真是髯手迹。起坐熨眼知有無。今人不作古人事。今世有此
古丈夫。我聞其來喜欲舞。病自能起不用扶。江淮旱久塵土惡。朝來清雨濯鬢髮。相看握手了無事。千里
一笑無乃迂。平生所樂在吳會。老死欲葬杭與蘇。過江西來二百日。冷落山水愁吳姝。新堤舊井各無恙。
參寥六一豈念吾。別後新詩巧摹寫。袖中知有錢塘湖。

禱雨龍公旣應劉景文有詩次韻

張公晚爲龍。抑自龍中來。伊昔風雲會。咄嗟潭洞開。精誠苟可貫。賓主真相陪。洞簫振羽舞。白酒浮雲罍。言從關洲妃。遠去焦氏臺。倒傾瓶中雨。一洗麥上埃。破旱不論功。乘雲却空回。嗟龍與我輩。用意豈遠哉。使君今子義。英風冠東萊。笑說龍爲友。幽明莫相猜。

劉景文家藏樂天身心問答三首戲書一絕其後

淵明形神自我樂。天身心相物。而今月下三人。他日當成幾佛。

西湖戲作一絕

一士千金未易償。我從陳趙兩歐陽。舉鞭拍手笑山簡。祇有并兒一葛強。

送歐陽季默赴闕一首

先生豈止一懷祖。郎君不減王文度。膝上幾日今白鬚。令我眼中見此父。汝南相從三晦朔。君去苦早我來暮。霜風淒緊正脫木。潁水清淺可立鷺。莫辭白酒瀉香泉。已覺扁舟掠新渡。坐看士衡執別手。更遣夢得出奇句。郎君可是筦庫人。乃使驥驥隨蹇步。置之行矣無足道。賢愚豈在遇不遇。

用前韻作雪詩留景文一首

萬松嶺上黃千葉。載酒年年踏松雪。劉郎去後誰復來。花下有人心斷絕。東齋夜坐搜雪句。兩手龜拆霜須折。無情豈亦畏嘲弄。穿簾入戶吹燈滅。紛紛兒女爭相似。碧海長鯨君未掣。朝來雲漢接天流。顧我小詩如點纈。歐陽趙陳在戶外。急掃中庭鋪木屑。交遊雖似雪柏堅。聚散行作風花警。晴光融作一尺泥。歸有何事真無說。泥乾路穩放君去。莫倚馬蹄如踏鐵。

和劉景文見贈一首

元龍本志陋曹吳。豪氣崢嶸老不除。失路今爲增等伍。作詩猶似建安初。西來爲我風黧面。獨臥無人雪
縞廬。留子非爲十日飲。要令安世誦亡書。

和劉景文雪

占雨又得雪。龜寧欺我哉。似知吾輩喜。故及醉中來。童子愁冰硯。佳人苦膠盃。那堪李常侍。入蔡夜銜枚。

次前韻送劉景文一首

白雲在天不可呼。明月豈肯留庭隅。怪君西行八百里。清坐十日一事無。路人不識呼尙書。但見凜凜雄
千夫。君一馬兩僕。率然相訪。逆旅多呼尙書。意謂君都頭也。豈知入骨愛詩酒。醉倒正欲蛾眉扶。一篇向
人寫肝肺。四海知我霜鬢鬚。君前有詩見寄云。四海共知霜鬢滿。重陽曾插菊花無。歐陽趙陳皆我有。豈
謂夫子駕復迂。爾來又見三黜柳。共此暖熱殮氳蘇。酒肴酸薄紅粉暗。祇有穎水清而姝。一朝寂寞風雨
散。對影誰念月與吾。郡中日與歐陽叔弼趙景貺陳履常相從。而景文復至。不數日柳戒之亦見過。賓客
之盛頃所未有。然不數日叔弼景文戒之皆去矣。何時歸帆汎江水。春酒一變甘棠湖。景文近卜居九江。
近甘棠湖。

以屏山贈歐陽叔弼一首

漫郎天骨清。生與世俗異。學道新有得。爲貧聊復仕。每於紅塵中。常起青霞志。屏山輒贈子。莫遣汙簪珥。
寓目紫翠間。安眠本非睡。夢中化爲鶴。飛入長松寺。

新渡寺席上次趙景覶陳履常韻送歐陽叔弼比來諸君唱和叔弼但袖手旁睨而已臨別忽出一篇頗有淵明風製坐皆驚歎

神屠不目全妙頰惟粧半更刀乃挨庖倚市必醜悍平生魏公籌忽斬郢人墁詩書亦用適道須此館多言雖數窮微中或排難子詩如清風寥寥發將旦胡爲久閉匿綺語真自患許時笑我癡隔屋相咏歎竟識彥道否絕叫呼百萬清朝固多士入門子皆冠莫言清潁水從此隔河漢異時我獨來得魚楊柳貫持歸不忍食尺素解悽斷中有清圓句銅丸飛柘彈春愁結凌澌正待一笑泮百篇儻寄我呻吟鄭人緩

卷二

詩五十六首

次韻趙景覶春思且懷吳越山水

歲華來無窮老眼久已靜春風如繫馬未動意先騁西湖忽破碎鳥落魚動鏡繁城理枯瀆放閘起膠艇願君營此樂宦事何時竟清河西湖三閘督君成之思吳信偶然出處付前定飄然不繫舟乘此無盡興醉翁行樂處草木皆可敬明朝游北渚急掃黃葉徑白酒真到齊紅裙已放鄭酒尚有香泉一壺爲樂全先生服不作樂也

次韻陳履常張公龍潭
經明宣城宰家此百尺瀾鄭翁不量力敢以非意干玄黃雜兩戰絳青表雙蟠事見龍公碑烈氣斃強敵

仁心惻飢寒精誠禱必赴苟簡求亦難蕭條麥麯枯浩蕩日月寬念子無吏責十日勤征鞍春蔬得雨雪少助先生槃龍不憚往來而我獨宴安閉閣默自責神交清夜闌

竹間亭小酌懷歐陽叔弼季默呈趙景貺陳履常

歲莫自急景我閑方緩觴醉餘西湖晚步轉北渚長地坐略少長意行無澗岡久知薺麥青稍喜榆柳黃
盎盎春欲動漱漱夜未央水天鷗鷺靜月霧松檜香撫景方婉婉懷人重淒涼豈無一老兵坐念兩歐陽
我意正麋鹿君才亦圭璋此會恐難久此歡不可忘

蠟梅一首贈趙景貺

天工點酥作梅花此有蠟梅禪老家蜜蜂採花作黃蠟取蠟爲花亦其物天工變化誰得知我亦兒嬉作
小詩君不見萬松嶺上黃千葉玉蘂檀心兩奇絕醉中不覺度千山夜聞梅香失醉眠歸來却夢尋花去
夢裏花仙覓奇句此間風物屬詩人我老不飲當付君君行適吳我適越笑指西湖作衣鉢

送王竦朝散赴闕

我家衡山公清而畏人知臧否不出口默識如蓍龜擢子拱把中云有驥驥姿胡爲三十載尙作窮苦詞
丈人不忘語未效此可疑竭來清潁上淚溼中郎詩怪我一年長而作十年衰同時幾人在豈敢怨白髮
願言指松柏永與霜雪期伯父爲衡州日與君相知有送行詩

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯曾經丹化米親授棗如瓜雲蒸作霧楷火滅噀雨巴

自此養鉛鼎，無窮走河車。至今許玉斧，猶事萼綠華。君曾見水州，何仙姑得藥餌之。人疑其以此壽也。故有丹化米菴，綠華之句。皆女仙事。我本三生人，疇昔一念差。前生或草聖，習氣餘驚蛇。儒臞謝赤松，佛縛慚丹霞。時時一篇出，擾擾四座譁。清詩得可驚，信美詞多夸。回車入官府，治具隨貧家。萍虧與豆粥，亦可成咄嗟。

閻立本職貢圖

正觀之德來萬邦，浩如滄海吞河江。音容儉孺服奇龍，橫絕嶺海逾濤灔。珍禽瑰產爭牽扛，名王解瓣却蓋幢。粉本遺墨開明窗，我喟而作心未降。魏徵封倫恨不雙。

次韻王滁州見寄

斯人何似似春雨，歌舞農夫怨行路。君看永叔與元之，坎輶一生遭口語。兩翁當年鬢未絲，玉堂揮翰手如飛。教得滁人解吟詠，至今里巷嘲輕肥。君家聯翩盡卿相，獨來坐歛谿山上。笑捐浮利一雞肋，多取清名幾熊掌。丈夫自重貴難售，兩翁今與青山久。後來太守更風流，要伴前人作詩瘦。我勸承明苦求出，到處遺蹤尋六一。憑君試與問琅耶，許我來游莫難色。

趙景貺以詩求東齋榜銘，昨日聞都下寄酒來戲和其韻求分一壺作潤筆也。

王孫天驥驥眸子，奧而澈。囊空學愈富，屋陋人更傑。我老書益放，筆落座爭掣。欲求東齋銘，要飲西湖雪。長鋒分未到，小硯乾欲裂。不似淳于髡，一石要燭滅。

洞庭春色并引

安定郡王以黃柑釀酒謂之洞庭春色香味三絕以餉其猶子德麟德麟以飲予爲作此詩醉後信筆頗有沓拖風氣

二年洞庭秋香霧長嘆手今年洞庭春玉色疑非酒賢王文字飲醉筆蛟蛇走既醉念君醒遠餉爲我壽
餅開香浮座琰凸光照牖方傾安仁醡潘岳笙賦云披黃葛以授杖傾綠盞以酌醕莫遣公遠鴟明皇食
柑凡千餘枚皆闕一瓣問進柑使者云中塗嘗有道士餽之蓋羅公遠也要當立名字未用問升斗應呼
釣詩鈎亦號掃愁帚君知葡萄惡正是嫫姆勦須君灑海盃澆我談天口

送路都曹一首并引

乖崖公在蜀有錄曹參軍老病廢事公責之曰胡不歸明日參軍求去且以詩留別其略曰秋光都似宦
情薄山色不如歸意濃公驚謝之曰吾過矣同僚有詩人而吾不知因留而慰薦之予幼時聞父老言恨
不問其姓名今都曹路君以小疾求致仕予誦此語留之不可乃採前人意作詩送之并送趙德麟陳履
常各賦一篇

積雪困桃李春心誰爲容淮光釀山色先作歸意濃我亦倦游者君恩繫疎慵欲留耿介士伴我衰遲
蹤吏課升斗積崎嶇等鉛春那將露電身坐待收千鍾結髮空百戰市人看先封誰能搔白首抱關望夕
烽子意亮已成我言寧復從恨無乖崖老一洗芥蒂胸我田荆谿上伏臘亦粗供懷哉江南路會作林下
逢

次韻陳履常雪中

可憐擾擾雪中人。飢飽終同寓一塵。老榦作花真強項。凍鳶儲肉巧謀身。忍寒吟咏君堪笑。得煖謹呼我未貧。坐聽屐聲知有路。擁裘來看玉梅春。

二鮮于君以詩文見寄作詩爲謝

我懷元祐初。珪璋滿清班。維時南隆老。奉使獨未還。迂叟向我言。青齊歲方艱。斯人乃德星。遺出虛危間。司馬溫公謂軾曰。子駿福星也。京東人困甚。且令往彼。召用既晚矣。天命良復慳。一朝失老驥。寂寞空帝閑。至今清夜夢。枕衾有餘潛。喜聞二三子。結髮師閔顏。高論已河漢。清詩鳴珮環。遙知三日雪。積玉埋崧山。誰念此幽桂。坐蒙榛與菅。故人在顚尾。投詩清冷灣。

次韻趙德麟雪中惜梅且餉柑酒三首

千花未分出梅餘。遣雪摧殘計已疎。臥聞點滴如秋雨。知是東風爲掃除。闌苑千葩映玉宸。人間祇有此花新。飛霽要欲先桃李。散作千林火迫春。蹀躞嬌黃不受鞶。東風暗與色香歸。偶逢白墮爭春手。遣入王孫玉斝飛。

和陳傳道雪中觀燈

新年樂事歎何曾。閉閣燒香一病僧。未忍便傾澆別酒。且來同看照愁燈。顚魚躍處新亭近。湖雪消時畫舫升。祇恐樽前無此客。清詩還有士龍能。

閱世亭詩贈任仲微

任公鎮西南。嘗贈繞朝策。當時若盡用。善陣無赫赫。淒涼十年後。邪正久已白。却留封德彝。天意眇難測。

象賢真驥種，號訴甘百謫。豈云報私仇，禍福指絡脈。高才食舊德，但恐里門窄。傷心千騎歸，贈印黃壤隔。惟有亭前檜，閱世不改色。千年與并在，記此王榮宅。

新渡寺送任仲微

春陰欲落雪野氣方升雲我游清潁尾想見翠被君古來聚散地與子復言分倦游安稅駕瘦田失歸耘獨宿古寺中荒雞亂鳴羣送予以曉角幽幽醒時聞

送運判朱朝奉入蜀

藹藹青城雲娟娟峨眉月隨我西北來照我光不滅我在塵土中白雲呼我歸我游江湖上明月溼我衣眠峨天一方雲月在我側謂是山中人相望了不隔夢尋西南路默數長短亭似聞嘉陵江跳波吹枕屏送君無一物清江飲君馬路穿慈竹林父老拜馬下不用驚走藏使者我友生聽訟如家人細說爲汝評若逢山中友問我歸何日爲話腰脚輕猶堪踏泉石

病中夜讀朱博士詩

病眼亂燈火細書數塵沙君詩如秋露淨我空中花古語多妙寄可識不可誇巧笑在頰頰哀音餘摻摵曾坑一掬春紫餅供千家懸知貴公子醉眼無眞茶崎嶇爛石上得此一寸芽緘封勿浪出湯老客未嘉

趙德麟餞飲湖上舟中對月

老守惜春意主人留客情官餘閑日月湖上好清明新火發茶乳溫風散粥餳酒闌紅杏闔日落大堤平清夜除燈坐孤舟肇岸撐遠君幘未墮對此月猶橫

贈朱遜之并引

元祐六年九月與朱遜之會議于穎。或言洛人善接花歲出新枝而菊品尤多。遜之曰：菊當以黃爲正。餘可鄙也。昔叔向聞鬷蔑一言知其爲人。予於遜之亦云。

黃花候秋節遠自夏小正。坤裳有正色。鞠衣亦令名。一從人僞勝。遂與天力爭。易性寓非族。改顏隨所令。新奇旣易售。粹駁宜相傾。疾惡逢伯厚。識真似淵明。君言我所印。世論誰改評。願君爲霜風。一掃紫與頴。

和趙德麟送陳傳道

二陳旣妙士。兩歐惟德人。王孫乃龍種。世有翰雲鱗。五君從我游。傾寫出怪珍。俗物敗人意。茲游實清醇。那知有聚散。佳夢失欠伸。我舟下清淮。沙水吹玉塵。君行踏曉月。疎木挂寸銀。尙寄別後詩。翦刻淮南春。

上已日與二子迨過游塗山荆山記所見

此生終安歸。還軫天下半。竭來乘櫻廟。復作微禹歎。昔自南河赴杭州。過此蓋二十二年矣。從祠及彼呱。有啓廟像設偶。此粲謂塗山氏。秦祖當侑坐。謂伯繫。夏郊亦薦裸。有繇廟可憐淮海人。尙記弧矢旦。淮南人相傳禹以六月六日生。是日數萬人會山上。雖傳記不載。然相傳如此。荆山碧相照。楚水清可亂。別人有餘坑。美石肖溫瓊。荆山下有卞氏採玉坑。石色如玉。不受鑿刻。取出山下。輒變色不復溫瑩。龜泉木杪出牛乳石池漫龜泉在荆山下。色白而甘。真陸羽所謂石池漫流者。有石記云。唐正元中。隨白龜流出。小兒強好古。侍史笑流汗。歸時蝙蝠飛。炬火記遠岸。

淮上早發

澹月傾雲曉角哀。小風吹水碧鱗開。此生定向江湖老。默數淮中十往來。

次韻徐仲車仲車耳聾

惡衣惡食詩愈好。恰似霜松轉春鳥。蒼蠅莫亂遠雞聲。世上誰如公覺早。八年看我走三州。元豐八年予赴登州。元祐四年赴杭州。今赴揚州。皆見仲車。月自當空水自流。人間擾擾真蠅蟻。應笑人呼作翻牛。

次韻林子中春日新堤書事見寄

東都寄食似孤雲。幘被真成一宿賓。收得玉堂揮翰手。却爲淮月弄舟人。羨君湖上齋搖碧。笑我花時飯有塵。爲報年來殺風景。連江夢雨不知春。來詩有芍藥春之句。揚州近歲率爲此會。用花十餘萬枝。吏緣爲姦。民極病之。故罷此會。

送陳伯修察院赴闕

裕陵固天縱。筆有雲漢姿。嘗重連山象。不數秋風辭。龍騰與虎變。狸豹復何施。我窮真有數。文字乃見知。聞君射策日。妙語發疇咨。一日喧萬口。驚倒同舍兒。豈知二十年。道路猶遲遲。苦言如藥石。暝眩終見思。屈信反覆手。獨於君可疑。四門方穆穆。行矣及此時。

送張嘉父長官

都城昔傾蓋。駿馬初服輶。再見江湖間。秋鷹已難韁。于今三會合。每進不少留。豫章既可識。瑚璉誰當收。微官有民社。妙割無雞牛。歸來我益敬。器博用自周。百年子初筵。我已迫旅酬。但當記苦語。高節貫白頭。軾在潁州與趙德麟同治西湖未成改揚州三月十六日湖成德麟有詩見懷次韻

太山秋毫兩無窮，鉅細本出相形中。
大千起滅一塵裏，未覺杭顥誰雌雄。
來詩云與杭爭雄，我在錢塘拓湖濤。
大堤士女爭昌丰，六橋橫絕天漢上。
北山始與南屏通，忽驚二十五萬丈。
老葑席卷蒼雲空，竭來顥尾弄秋色。
一水縈帶昭靈宮，坐思吳越不可到。
借君月斧修瞳臘，二十四橋亦何有。
換此十頃玻瓈風，雷塘水乾禾黍滿。
寶釵耕出餘鸞龍，明年詩客來弔古。
伴我霜夜號秋蟲，德麟見約來揚寄居，亦有意求揚
德麟見約來揚寄居，亦有意求揚

侔

次韻趙德麟西湖新成見懷絕句

壺中春色謂洞庭春色也。飲中仙騎鶴東來，獨惘然。
猶有趙陳同李郭，不妨同泛過湖船。

再次韻趙德麟新開西湖

使君不用山麴窮，飢民自逃泥水中。
欲將百瀆起凶歲，免使甌石愁揚雄。
西湖雖小亦西子，縈流作態清而丰。
千夫餘力起三閘，焦陂下與長淮通。
十年憔悴塵土窟，清瀾一洗啼痕空。
王孫本自有仙骨，平生宿衛明光宮。
一行作吏人不識，正似雲月初朦朧。
時臨此水照冰雪，莫遣白髮生秋風。
定須却致兩黃鸝，新與上帝開灌龍。
湖成君歸侍帝側，燈花已綴釵頭蟲。
予以穎人苦饑，奏乞留黃河夫萬人。
修境內溝洫，詔許之。因以餘力浚治此湖。

到官病勸未嘗會客，毛正仲惠茶乃以端午小集石塔戲作一詩爲謝。
我生亦何須，一飽萬想滅。
胡爲設方丈，養此膚寸舌。
爾來又衰病，過午食輒噎。
繆爲淮海帥，每愧廚傳缺。
爨無欲清人，奉使免內熱。
空煩赤泥印，遠致紫玉玦。
爲君伐羔脈，歌舞菰黍節。
禪窗麗午景，蜀井出冰雪。

坐客皆可人。鼎器手自絜。金釵候湯眼。魚蟹亦應訣。遂令色香味。一日備三絕。報君不虛授。知我非輕啜。

雙石并引

至揚州獲二石。其一綠色。岡巒迤邐。有穴達于背。其一玉白可鑒。瀆以盆水。置几案間。忽憶在潁州日。夢人請住一官府。榜曰仇池。覺而誦杜子美詩曰。萬古仇池穴。潛通小有天。乃戲作小詩爲僚友一笑。夢時良是覺時非。汲水埋盆故自癡。但見玉峯橫太白。便從鳥道絕峨眉。秋風與作煙雲意。曉日令涵草木姿。一點空明是何處。老人真欲住仇池。

次韻和晁無咎學士相迎

少年獨識晁新城。閉門卻掃卷旆旌。胸中自有談天口。坐卻秦軍發墨守。有子不爲謀。置錐虹霓吞吐忘寒飢。端如太史牛馬走。嚴徐不敢連尻睢。裴回未用疑相待。枉尺知君有家戒。避人聊復去瀛洲。伴我真能老淮海。夢中仇池千仞巖。便欲攬我青霞幘。且須還家與婦計。我本歸路連西南。老人飲酒無人佐。獨看紅藥傾白墮。每到平山憶醉翁。懸知他日君思我。路旁小兒笑相逢。齊歌萬事轉頭空。賴有風流賢別駕。猶堪十里卷春風。

次韻范淳父送秦少章一首

宿緣在江海。世網如予何。西來庾公塵。已濯長淮波。十年淮海人。初見一麥禾。但欣爭訟少。未覺舟車多。秦郎忽過我。賦詩如卷阿。句法本黃子。謂魯直也。二豪與揩磨。其兄少游與張文潛。嗟我久離羣。逝將將西河。後生多名士。欲薦空悲歌。小范真可人。獨肯勤收羅。瘦馬識驛耳。枯桐得雲和。近聞館李生。李薦方。

叔病鶴借一柯贈行苦說我妙語慰蹉跎西羌已解仇烽火連朝那坐籌付公等吾將寄潛沱

靈隱前一首贈唐林夫

靈隱前天竺後兩澗春淙一靈鷲不知水從何處來跳波赴壑如奔雷無情有意兩莫測肯向冷泉亭下相繫回我在錢塘六百日山中暫來不暖席今君欲作靈隱居葛衣草屨隨僧蔬能與冷泉作主一百日不用二十四考書中書

滕達道挽詞二首

先帝知公早虛懷第一人至今詩禮將惟數武宣臣材大雖難用時來亦少伸高平風烈在威敏典型新
公少受知於范希文孫元規空試乘邊策寧留相漢身淒涼舊部曲淚濕塚前麟

雲夢連江雨樊山落木秋公方占賈鵬我正買龔牛共有江湖樂俱懷畎畝憂荆溪欲歸老浮玉偶同游
骯髒儀型在驚呼歲月邈回首頭雜歌哭挽語不成謳

次韻蘇伯固遊蜀岡送李孝博奉使嶺表

新苗未沒鶴老葉方翳蟬綠渠浸麻水白板燒松煙笑窺有紅頰醉臥皆華顛家家機杼鳴樹樹梨棗懸
野無佩犧子府有騎鶴仙觀風嶠南使出相山東賢渡江弔很石過嶺酌貪泉與君步徙倚望彼修連娟
願及南枝謝早隨北鴈翩歸來春酒熟共看山櫻然

送晁美叔

我年二十無朋儕當時四海一子由君來扣門如有求頑然病鶴清而修醉翁遣我從子游翁如退之踏

軻丘尙欲放子出一頭嘉祐初軾與子由寓興國浴室美叔忽見訪云吾從歐陽公游久矣公令我來與子定交謂子必名世老夫亦須放他出一頭地酒醒夢斷四十秋病鶴不病骨愈蚪惟有我顏老可羞醉翁賓客散九州幾人白髮還相收我如懷祖拙自謀正作尙書已過優君求會稽實良籌往看萬壑爭交流君近乞越州

王文玉挽詞

才名誰似廣文寒月斧雲斤琢肺肝玄晏一生都臥病子雲三世不遷官幽蘭空覺香風在宿草何曾淚葉乾猶喜諸郎有曹志文章還復富波瀾

送芝上人游廬山

二年閱三州我老不自惜團團如磨牛步步踏陳迹豈知世外人長與魚鳥逸老芝如雲月炯炯時一出比年三見之常若有所適逝將走廬阜計闢道愈密吾生如寄耳出處誰能必江南千萬峯何處訪子室

送程德林赴真州

君爲縣令元豐中吏貪功利以病農君欲言之路無從移書諫臣以自通陳臣蹇受之也元豐天子爲改容我時匹馬江西東問之逆旅言頗同老人愛君如劉寵小兒敬君如魯恭爾來明目達四聰收拾駟驥冀北空君爲赤令有古風政聲直入明光宮天廕如海養羣龍并收其子豈不公君之子祁舉制策文學行義爲時所稱白沙何必煩此翁

谷林堂詩

深谷下窈窕。高林合扶疎。美哉新堂成。及此秋風初。我來適過雨。物至如娛予。穉竹真可人。霜節已專車。老槐苦無賴。風花欲墮渠。山鴉爭呼號。谿蟬獨清虛。寄懷勞生外。得句幽夢餘。古今正自同。歲月何必書。

予少年頗知種松手植數萬株。皆中梁柱矣。都梁山中見杜輿秀才求學其法。戲贈二首。

露宿泥行草棘中。十年春雨養鬚龍。如今尺五城南杜。欲問東坡學種松。

君方掃雪收松子。我已開榛得伏苓。爲問何如插楊柳。明年飛絮作浮萍。

行宿泗間見徐州張天驥次舊韻

二年二躡過淮舟。款段還逢馬少游。無事不妨長好飲。箸書自要且窮愁。孤松早偃元非病。倦鳥雖還豈是休。更欲河邊幾來往。祇今霜雪已蒙頭。

次韻劉景文贈傅曦秀才

窈眇文章宜和寡。嶧肝肺亦交難。未能飛瓦彈清角。肯便投泥戲激寒。忽見秋風吹洛水。遙知霜葉滿長安。詩成送與劉夫子。莫遣孫郎帳下看。

在彭城日與定國爲九日黃樓之會。今復以是日相遇于宋。凡十五年憂樂出處有不可勝言者。而定國學道有得。百念灰冷而顏益壯。顧予衰病心形俱瘁。感之作詩。

菊殘萸囊自古傳。長房寧復是臞仙。應從宋武橫刀日。數到劉公戲馬年。對玉山人雖老矣。見恆河性故依然。王郎九日詩十首。今賦黃樓第二篇。

九日次定國韻

朝菌無晦朔，蟪蛄疑春秋。南柯已一世，我眠未轉頭。
仙人視吾曹，何異蜂蟻稠。不知蠻觸氏，自有兩國憂。
我觀去來今，未始一念留。奔馳竟何得，而起無窮羞。
王郎誤涉世，屢獻久不醸。黃金散行樂，清詩出窮愁。
俛仰四十年，始知此生浮。軒裳陳道路，往往兒童收。
封侯起大第，或是君家驕。似聞負販人，中有第一流。
炯然徑寸珠，藏此百結裘。意行無車馬，倏忽略九州。
邂逅獨見之，天與非人謀。笑我方醉夢，衣冠戲沐猴。
力盡病驥驥，伎窮老伶儻。北山有雲根，寸田自可耰。
會當無何鄉，同作逍遙遊。歸來城郭是，空有纍纍丘。

召還至都門先寄子由

老身倦馬河堤永，踏盡黃榆綠槐影。
荒雞號月未三更，客夢還家得俄頃。
歸老江湖無歲月，未填溝壑猶朝請。
黃門殿中奏事罷，詔許來迎先出省。
已飛青蓋在河梁，定餉黃封兼賜茗。
遠來無物可相贈，一味豐年說淮穎。

次韻定國見寄

還朝如夢中，雙闕眩金碧。
復穿鶴鷺行，強寄麋鹿迹。
勞生苦晝短，展轉不能夕。
默坐數更鼓，流水夜自逆。
故人爲我謀，此志何由畢。
越吟知聽否，誰念病莊烏。時方請越

次韻蔣穎叔錢穆父從駕景靈宮二首

歸來病鶴記城闈，舊踏松枝雨露新。
半白不羞垂領髮，軟紅猶戀屬車塵。
雨收九陌豐登後，日麗三元下。
降辰粗識君王爲民意，不才何以助精禋。
前輩戲語有西湖風月不如東華軟紅香土
與君並直記初元，白首還同入禁門。
玉殿齊班容小語，霜廷稽首滋微溫。
適與穆父並拜廷中地，皆流濕。

相與小語道之。病貪賜茗浮銅葉。老怯香泉灑寶樽。回首鶴行有人傑。坐知羌虜是游魂。

卷三

詩六十六首

軾近以月石硯屏獻子功中書公復以涵星硯獻純父侍講子功有詩純父未也復以月石風林屏贈之謹和子功詩并求純父數句

紫潭出玄雲。翳我潭中星。獨有潭上月。倒挂紫翠屏。我老不看書。默坐養此昏。花晴時時一開眼。見此雲。月眼自明。久知世界一泡影。大小真僞何足評。笑彼三子歐蘇梅。無事自作雪羽爭。事見三人詩集故將屏硯送兩范。要使珠璧栖窗櫺。大范忽長謠。語出月晉令人驚。皇甫湜云穿天心出月晉意外驚人語非尋常小范當繼之。說破星心如雞鳴。孟郊聞雞詩云似聞孤月口能說落星心狀頭復一月。下有風林橫。急送小范家。護此涵星泓。願從少陵博一句。山木盡與洪濤傾。

次韻范純父涵星硯月石風林屏詩

月次于房歷三星。斗牛不神箕獨靈。簸搖桑榆盡西靡。影落蘇子硯與屏。天工與我兩厭事。孰居無事爲此形。與君持橐侍帷幄。同到溫室觀堯蓂。自憐太史牛馬走。技等卜祝均倡伶。欲留衣冠挂神武。便擊雲水歸南溟。陶泓不稱管城沐。醉石可助平泉醒。故持二物與夫子。欲使妙質留天庭。但令滋液到枯槁。勿遣光景生晦冥。上書挂名豈待我。獨立自可當雷霆。我時醉眠風林下。夜與漁火同青熒。撫物懷人應獨

歎作詩寄子誰當聽

次韻錢穆父會飲

彈冠恨不早，挂冠常苦遲。
盛服每假寐，角闕時伏思。
東門未祖道，西山空拄頤。
逝將江海去，安此麋鹿姿。
要當謀三徑，何暇擇一枝。
與君幾合散，得酒忘淳漓。
君談似落屑，我飲如奕棋。世有作詩如奕棋。奕棋如飲酒。
飲酒乃天戒之語，僕此二事皆不能。
居官不任事，造物真見私。
主人獨賢勞，金穀方流馳。
行人亦結束，秋杜乃歸期。
公卿雖少安，河流正東釀。
我得會稽去，方回良不癡。

次韻穆父尙書侍祠郊丘瞻望天光退而相慶引滿醉吟

千章杞梓蔭雲天，樗散誰收老鄭虔。
喜氣到君浮白裏，豐年及我挂冠前。
令嚴鐘鼓三更月，野宿貔貅萬竈煙。
太息何人知帝力，歸來金帛看頰肩。

郊祀慶成詩

帝出乘昌運，天心予太平。
文章三代繼，制作七年成。
大祀乾坤合，剛辰日月明。
泰壇朝掃地，魄寶夜垂精。
仰御圓蒼蓋，環觀海嶽城。
北流吞朔易，西極落攬捨。
升燎靈光答，回鑾瑞霧迎。
需雲偏枯槁，解雨達勾萌。
可頌非天德，因箴亦下情。
民言知有酌，帝謂本無聲。
富國由崇儉，斬年在好生。
無心斯格物，克己自消兵。
化國安新政，孤臣反舊耕。
還將清廟什，留與野人賡。

次韻奉和錢穆父蔣穎叔王仲至詩四首見和西湖月下聽琴

謾謾松下風，藹藹壠上雲。
聊將竊比我，不堪持寄君。
半生寓軒冕，一笑當琴尊。
良辰飲文字，晤語無由醺。

我有鳳鳴枝。背作蛇虯紋。月明委靜照。心清得奇聞。當呼玉潤手。一洗羯鼓昏。請歌南風曲。猶作虞書渾。
家有雷琴甚奇古。玉潤道人雀閑妙於雅聲。當呼使彈。

見和仇池

上窮非想亦非非。下與風輪共一癡。翠羽若知牛有角。空鏘何必井之眉。還朝暫接鶼鸞翼。謝病行收麋鹿姿。記取和詩三益友。他年彌節過仇池。

玉津園

承平苑囿雜耕桑。六聖勤民計慮長。碧水東流還舊派。玉津分濱河上流復合於下紫壇南峙表連岡。不逢遲日鶯花亂。空想疎林雪月光。千畝何時躬帝藉。斜陽寂歷鎖雲莊。

藉田

竊脂方紀瑞。布穀未催耕。魚未依蘋渚。蝸涎上綵盤。江湖來夢寐。蓑笠負平生。琴裏思歸曲。因君一再行。
竟不從不知定國何從見此書。作詩稱道不已。僕不復記其云何也。次韻答之。

頃年楊康功使高麗還奏乞立海神廟。板檣僕嫌其地湫隘移書使遷之。文登因古廟而新之。楊
退之仙人也。遊戲於斯文。談笑出偉奇。鼓舞南海神。頃年三韓使。幾爲鮫鰐吞。歸來築祠宇。要使百賈奔。
板橋商賈所聚。我欲遷其廟。下數浮空羣。謂登州海市。移書竟不從。信非磊落人。公胡爲拳拳繫此空中。
雲。作詩頌其美。何異刻劍痕。我今已括囊。象在六四坤。

沐浴啓聖僧舍與趙德麟邂逅一首

南山北澗兩非真。東穎西湖迹已陳。季子來歸初可喜。老聃新沐定非人。酒清不醉休休暖。睡穩如禪息。息勻。自笑塵勞餘一念。明年同泛越谿春。

次韻王仲至喜雪御筵一首

三軍喜氣鏘飛花。睡起空驚月在沙。未集驛鈞金駸裊。故殘鳩鵠玉橫斜。偶還仗內身如寄。尙憶江南酒可賒。宣勸不多心。自弊強扶衰白拜君嘉。

僕所藏仇池石希代之寶也。王晉卿以小詩借觀意在於奪。僕不敢不借。然以此詩先之。
海石來珠宮。秀色如蛾綠。坡陀尺寸間。宛轉陵巒足。連娟二華頂。空洞三茅腹。初疑仇池化。又恐瀛洲蹙。
慇懃嶠南使。餽餉淮東牧。僕在揚州。程德孺自嶺南解官。以此石見遺。得之喜無寐。與汝交不瀆。盛以高麗盆。藉以文登玉。僕以高麗所鑄大銅盆貯之。又以登州海石如碎玉者附其足。幽光先五夜。冷氣壓三伏。老人生如寄。衡茅久未卜。一夫幸可致。千里還相逐。風流貴公子。竄謫武當谷。見山應已厭。何事奪所欲。欲留嗟趙弱。寧許負秦曲。傳觀慎勿許。間道歸更速。

次天字韻答岑巖起

一聲清蹕霧開天。百辟心莊豈貌虔。回顧驚君珠玉側。同升愧我秕糠前。裴回月色留壇影。縹緲松香泛蠟煙。近制以林燭。松明易林益。莫歎郎潛生白髮。聖朝求舊鄙鳶肩。

石塔寺并引

世傳王播飯後鐘詩。蓋揚州石塔寺事也。相傳如此。戲作此詩。

飢眼眩東西。詩腸忘蚤晏。雖知燈是火。不悟鐘非飯。
山僧異漂母。但可供一莞。胡爲三百年。記憶作此訕。
齋廚養若人。無益祇遺患。乃知飯後鐘。闇梨蓋具眼。

次韻蔣穎叔二首

扈從景靈宮

道人幽夢曉初還。已覺笙簫下月壇。風伯前驅清宿霧。祝融驂乘破朝寒。
英姿連璧從多士。妙句鏘金和八鑾。已向詞臣得頗牧。時穎叔集除熙河帥。
路人莫作老儒看。

凝祥池

似知金馬客。時夢碧雞坊。冰雪消殘臘。煙波寫故鄉。
鳴鑾自容與。立馬久回翔。乞與三韓使。新圖到樂浪。
時高麗使在都下。每至勝境輒圖畫以歸。

和叔盈畫馬次韻

天驥德力備。馬外龍麟中。皇天不遺言。兀與圖畫同。
駿駘飽官粟。未受一洗空。十駕均一至。何事箚雲風。

王晉卿示詩欲奪海石錢穆父王仲至蔣穎叔皆次韻穆至二公以爲不可許獨穎叔不然今日
穎叔見訪親覩此石之妙遂悔前語軾以謂晉卿豈可終閉不予者若能以韓幹二散馬易之者
蓋可許也復次前韻

相如有家山。縹緲在眉緣。誰云千里遠。寄此一鑾足。
平生錦綉腸。蚤歲藜莧腹。從教四壁空。未遣兩峯蹙。
吾今况衰病。義不忘樵牧。逝將仇池石。歸汎岷山瀆。
守子不貪寶。完我無瑕玉。故人詩相戒。妙語予所伏。

一篇獨異論。三占從兩卜。君家畫可數。天驥紛相逐。風驟掠原野。電尾梢澗谷。君如許。相易是亦我所欲。今朝安西守。來聽陽關曲。勸我留此峯。他日來不速。

軾欲以石易畫。晉卿難之。穆父欲兼取二物。穎叔欲焚畫碎石。乃復次前韻。并解三詩之意。
春冰無真堅。露葉失故綠。鸚疑鵬萬里。茲笑夔一足。二豪爭攘袂。先生一捧腹。明鏡旣無臺。淨餅何用斃。
古賦聲通盆。山不可隱。畫馬無由牧。聊將置庭宇。何必棄溝瀆。焚寶真愛寶。碎玉未忘玉。久知公子賢。出
語耆年伏。欲觀博物妙。故以求馬卜。維摩旣復捨。天女還相逐。授之無盡燈。照此久幽谷。定心無一物。法
樂勝五欲。三峨吾鄉井。萬里君部曲。臥雲行歸休。破賊見神速。晉卿將種常有此志。

生日蒙劉景文以古畫松鶴爲壽。且覩嘉篇。次韻爲謝。

問予一室間。寧有千里廓。塵心洗長松。遠意發孤鶴。生朝得此壽。死籍疑可落。微言在參同。妙契藏九籥。
故人有奇趣。逸想寄幽壑。霜枝謝寒暑。雲翮無前却。何須構明堂。未羨巢阿閣。緬懷別時語。復作數日惡。
詩腴固堪殮。字瘦還可愕。高標忽在眼。清夢了如昨。君今增等伍。志與湛輩各。豈待相顧言。方爲不朽託。
子雲老執戟。長孺終主爵。吾當追喬松。子亦鄙衛霍。

程德孺惠海中柏石。兼辱佳篇。輒復和謝。

嵐薰瘴染却膚腴。笑飲貪泉獨繼吳。未欲連車收薏苡。肯教沉網取珊瑚。不知庾嶺三年別。收得曹谿一滴無。但指庭前雙柏石。要予臨老識方壺。

次秦少游韻。贈姚安世。

帝城如海欲尋難。肯捨漁舟到杏壇。剝喙扣君容膝戶。巍峨笑我切雲冠。問羊獨怪初平在。牧豕應同德。曜看肯把參同較。同異小窗相對爲研丹。

次丹元姚先生韻

浮生知幾何。僅熟一釜羹。那於俯仰間。用此委曲情。自憐無他腸。偶亦得此生。懸知當去客。中有不亡存。但恐宿緣重。每爲習氣昏。似聞梅子真。近在吳市門。未能肩拊洪。但欲目擊溫。不敢扣門呼。恐作踰垣奔。且令紹介先。徐以方便論。不學劉更生。黃金鑄尙方。不學房次律。身事問穎陽。王烈亦何人。叔夜未可量。獨見神山開。遽殮石髓香。至道尙聽瑩。蠹材終蹶張。先生喜而笑。幅巾登我堂。苦誓指黃壤。要言刻青琅。蓬萊在何許。弱水空相望。且當從嵇阮。聊復數山王。達人友四海。曲士守一疆。慎勿使形譟。兒童驚夜光。

次韻秦少游王仲至元日立春三首

省事天公厭兩回。新年春日併相催。慇懃更下山陰雪。要與梅花作伴來。

己卯嘉辰壽阿同。願渠無過亦無功。明年春日江湖上。回首觚稜一夢中。子由亦字同叔。元日己卯渠本命也。

詞鋒雖作楚騷寒。德意還同漢詔寬。好遣秦郎供帖子。盡驅春色入毫端。立春日翰林學士供詩帖子

上元侍飲樓上三首呈同列

淡月疎星遶建章。仙風吹下御爐香。侍臣鵠立通明觀。一朶紅雲捧玉皇。薄雪初消野未耕。賣薪買酒看升平。吾君勤儉倡優拙。自是豐年有笑聲。

老病行穿萬馬羣，九衢人散月紛紛。歸來一點殘燈在，猶有傳柑遺細君。
侍飲樓上則貴戚爭以黃柑送近臣，謂之傳柑，蓋尙矣。

送蔣穎叔帥熙河詩并引

穎叔出使臨洮，軾與穆父仲至同餞之。各賦詩一篇，以今我來思爲韻，致遄歸之意。軾得我字，西方猶宿師，論將不及我。苟無深入計，緩帶我亦可。承明正須君，文字粲藻火自薦。雖云數留行，終不果正坐喜論兵。臨老付邊瑣，新詩出談笑。僚友困掀簸，我欲歌杕杜。楊柳方婀娜，邊風事首虜。所得蓋么麼，願爲魯連書。一射聊城筈，陰功在不殺。結草酬魏顆。

再送二首

使君九萬擊鵬鯤，肯爲陽關一斷魂。不用寬心九千里，安西都護國西門。

餘刃西屠橫海鯤，應予詩讖是游魂。歸來趁別陶洪景，看挂衣冠神虎門。

次韻穎叔觀燈

安西老守是禪僧，到處應然無盡燈。永夜出遊從萬騎，諸羌入看擁千層。便因行樂令投甲，不用防秋更打冰。振旅歸來還侍燕，十分宣勸恐難勝。

次韻王晉卿奉詔押高麗燕射

北苑傳呼陸楣郎，東夷初識令君香。天山自可三箭取，海國何勞一葦航。宣勸不詞金盃側，醉歸爭看玉鞭長。錦囊詩草勤收拾，莫遣雞林得夜光。

次韻錢穆父王仲至同賞田曹梅花

寒廳不知春。獨立耿玉雪。閉門愁永夜。置酒及明發。忽驚庭戶曉。未受煙雨沒。浮光風宛轉。照影水方折。鬢霜未易掃。眉斧真自伐。惟當此花前。醉臥黃昏月。

送襄陽從事李友諒歸錢塘

居杭積五歲。自意本杭人。故山歸無家。欲卜西湖隣。良田不難買。靜士誰當親。髯張旣超然。老潛亦絕倫。李子冰玉姿。文行兩清淳。歸從三人游。便足了此身。公堤不改昨。姥嶺行開新。幽夢隨子去。松花落衣巾。

次韻吳傳正枯木歌

天公水墨自奇絕。瘦竹枯松寫殘月。夢回疎影在東窗。驚怪霜枝連夜發。生成變壞一彈指。乃知造物初無物。古來畫師非俗士。妙想實與詩同出。龍眠居士本詩人。能使龍池飛霹靂。君雖不作丹青手。詩眼亦自工。識拔龍眠胸中有千駟。不獨畫肉兼畫骨。但當與作少陵詩。或自與君拈禿筆。東南山水相招呼。萬象入我塵尼珠。盡將書畫散朋友。獨與長鋏歸來乎。

送黃師是赴兩浙憲

世久無此士。我晚得王孫。寧非叔度家。豈出次公門。白首沈下吏。綠衣有公言。哀哉吳越人。久爲江湖吞。官自倒帑廩。飽不及黎元。近聞海上港。漸出水底村。願君五袴手。招此半菽魂。一見刺史天。稍忘獄吏尊。會稽入吾手。鏡湖小於盆。比我東來時。無復瘡痍存。

送范中濟經略侍郎分韻賦詩。軾得先字。且贈以魚枕盃四馬箑一。

梁李久樂禍。自焚豈非天。兩鼠鬪穴中。一勝亦偶然。謀初要百慮。善後乃萬全。廟堂選世將。范氏真多賢。仁風被宿麥。綠浪搖秦川。號令聳毛羽。先聲落虛弦。我家天一方。去路城西偏。投竿困障日。賣劍行歸田。贈君荆魚盃。副以蜀馬鞭。一醉可以起毋令。祖生先。

書晁說之考牧圖後

我昔在田間。但知羊與牛。川平牛背穩。如駕百斛舟。舟行無人岸自移。我臥讀書牛不知。前有百尾羊。聽我鞭聲如鼓鼙。我鞭不妄發。視其後者而鞭之。澤中草木長。草長病牛羊。尋山跨坑谷。騰趨筋骨強。煙蓑雨笠長林下。老去而今空見畫。世間馬耳射東風。悔不長作多牛翁。

呂與叔學士挽詞

言中謀猷行中經。關西人物數清英。欲過叔度留終日。未識魯山空此生。論議凋零三益友。功名分付二難兄。老來尙有憂時歎。此涕無從何處傾。

丹元子示詩飄飄然有謫仙風氣吳傳正繼作復次其韻

飛仙亦偶然。脫命瞬息中。惟詩不可擬。如寫天日容。夢中哦七言。玉丹已入懷。一語遭虧綽。失身墮蓬萊。蓬萊至今空。護短不養才。上界足官府。謫仙應退休。可憐吳與蘇。骯髒雪滿頭。雪滿頭。終當却與丹元子。笑指東海乘桴浮。

次王定國韻書丹元子寧極齋

仙人與吾輩。寓迹同一塵。何曾五漿餽。但有爭席人。寧極無常居。此齋自隨身。人那識郗鑒。天不留封倫。

誤落世網中，俗物愁我神。先生忽扣戶，夜呼祁孔賓。便欲隨子去，箸書未絕鱗。願挂神虎冠，往卜飲馬鄰。王郎濯紈綺，意與陋巷親。南游苦不蚤，儻及尊鱸新。

王仲至侍郎見惠稱栝種之禮曹北垣下今百餘日矣蔚然有生意喜而作詩

翠栝東南美，近生神嶽陰。惜哉不可致，霜根絡雲岑。仙風振高標，香實隕平林。偶隨樗櫟生，不爲樵牧侵。忽驚黃茅嶺，稍出青玉鍼。好事雖力取，王城少知音。豈無換鵝手，但知覓來禽。高懷獨夫子，一見捐橐金。得之喜不寐，贈我意殊深。公堂開後閤，凡木愧華簪。栽培一寸根，寄予百年心。常恐樊籠中，摧我鸞鶴衿。誰知積雨後，寒芒曉森森。恨我迫歸老，不見汝十尋。蒼皮護玉骨，旦莫視古今。何人風雨夜，臥聽飢龍吟。

次韻錢穆父馬上寄蔣穎叔二首

玉關不用一丸泥，自有長城鳥鼠西。剩與故人尋土物，臘糟紅麪寄駝蹄。多買黃封作洗泥，使君來自隴山西。高才得免人人羨，爭欲尋蹤覓舊蹟。

表弟程德孺生日

仗下千官散紫庭，時聞小語說蘇程。長身自昔傳甥舅，壽骨遙知是弟兄。予與君皆壽骨真耳，班列中多指予二人不間而知其爲中表也。曾活萬人寧望報，君在楚州予在杭州。皆過飢歲活數萬人，祇求五畝却歸耕。四朝遺老凋零盡，鶴髮他年幾箇迎。

七年九月自廣陵召還復館于浴室東堂八年六月乞會稽將去汝公乞詩乃復用前韻

八 餓今年綱到最遲

夢遶吳山却月廊。白梅盧橘覺猶香。杭州梵天寺有月廊數百間。寺中多白楊梅盧橘。會稽且作須臾意。從此歸田策最良。

東南此去幾時歸。倦鳥孤雲豈有期。斷送一生消底物。三年光景六篇詩。

吳子野將出家贈以扇山枕屏

峨峨扇中山。絕壁信天剖。誰施大圓鏡。衡霍入戶牖。得之老月師。畫者一醉叟。常疑若人胸。自有雲夢藪。千巖在掌握。用捨彈指久。低昂不自知。恨寄兒女手。短屏雖曲折。高枕謝奔走。出家非今日。法水洗無垢。浮游雲釋嶠。燕坐柳生肘。忘懷紫翠間。相與到白首。

東府雨中別子由

庭下梧桐樹。三年三見汝。前年適汝陰。見汝鳴秋雨。去年秋雨時。我自廣陵歸。今年中山去。自首歸無期。客去莫歎息。主人亦是客。對床定悠悠。夜雨空蕭瑟。起折梧桐枝。贈汝千里行。重來知健否。莫忘此時情。

謝仲適坐上送王敏仲北使

衝風振河朔。飛霧失太行。相逢不相識。下馬須眉黃。洗眼忽驚笑。見此玉節郎。喜有賢主人。共此燈燭光。書丹元子所示李太白真

天人幾何同一漚。謫仙非謫乃其游。歷斥八極隘九州。化爲兩鳥鳴相酬。一鳴一止三千秋。開元有道爲

少留磨之不可矧肯求。西望太白橫峨岷。眼高四海空無人。大兒汾陽中令君。小兒天台坐忘真。生年不知高將軍。手汗君足乃敢曠。作詩一笑君應聞。

次韻曾仲錫承議食蜜漬生荔支

代北寒蘿擣韭萍。奇苞零落似晨星。逢鹽久已成枯臘。得蜜猶應是薄刑。欲就左慈求拄杖。便隨李白跨滄溟。攀條與立新名字。兒女稱呼恐不經。俗有十八娘荔支。

大行太皇太后挽詞二首

至矣吾三后。功高漢已還。復推元祐冠。蓋得永昭全。臣嘗於經筵論奏仁宗皇帝謚曰明孝。若明而不仁。則民畏而不愛。仁而不明。則民愛而不畏。今大行太皇太后亦兼此二德。故天下思慕。亦幾於仁宗也。有作猶非聖。無私乃是天。侍臣談要道。家法信家傳。宰相以下嘗於經筵論奏。祖宗以來家法十餘事。書於記注。

却狄安諸夏。先王社稷臣。固應祠百世。何止活千人。定策天知我。忘家帝念親。萬方何以報。得疾爲勤民。

再和曾仲錫荔支

柳葉着水萬浮萍。荔實周天兩歲星。柳至易成飛絮落水中。經宿卽爲浮萍。荔支至難長。二十四五年乃實本自玉肌非鵠浴。至今丹殼似猩刑。侍郎賦詠窮三峽。妃子煙塵動四溟。莫遣詩人說功過。且隨香草附騷經。

次韻滕大夫三首

雪浪石

太行西來萬馬屯，勢與岱嶽爭雄尊。
飛孤上黨天下脊，半掩落日先黃昏。
削成山東二百郡，氣壓北三家。
千峯右卷蟲牙帳，崩崖鑿斷開土門。
竭來城下作飛石，一礮驚落天驕魂。
承平百年烽燧冷，此物僵臥枯榆根。
畫師爭摹雪浪勢，天工不見雷斧痕。
離堆四面繞江水，坐無蜀士誰與論。
老翁兒戲作飛雨，把酒坐着看珠跳盆。
此身自幻孰非夢，故園山水聊心存。

同前

我頃三章乞越州，欲尋萬壑看交流。
且憑造物開山骨，已見天吳出浪頭。
石中似有海獸形狀，履道鑿池雖可致。
玉川卷地若爲收，洛陽泉石今誰主。
莫學癡人李與牛。

沉香石

壁立孤峯倚硯長，共疑沉水得頑蒼。
欲隨楚客綴蘭佩，誰信吳兒是木腸。
山下曾逢化松石，玉中還有辟邪香。
早知百和俱灰燼，未信人言弱勝強。

石芝詩并引

予昔夢食石芝，作詩記之。今乃真得石芝於海上。子由和前詩見寄，予頃在京師，有鑿井得如小兒手以獻者，臂指皆具膚理，若生。予聞之，隱者曰：此肉芝也。與子由烹而食之，追記其事，復次前韻。

土中一掌嬰兒新，爪指良是肌骨匀。
見之怖走誰敢食，天賜我爾不及賓。
旌陽遠游同一許，長史玉斧皆門戶。
我家韋布三百年，祇有陰功不知數。
跪陳八簋加六瑚，化人視之真塊蘇。
肉芝烹熟石芝老，笑睡熊

掌噸雕胡老蠶作蠹何時脫夢想至人空激烈古來大藥不可求真契當如磁石鐵

鶴歎

園中有鶴馴可呼我欲呼之立坐隅鶴有難色側睨予豈欲臆對如鵬乎我生如寄良畸孤三尺長脰閣瘦軀俛啄少許便有餘何至以身爲子娛驅之上堂立斯須投以餅餌視若無嘵然長鳴乃下趨難進易退我不如

送曾仲錫通判如京師

邊城歲暮多風雪強壓春醪與君別玉帳夜談霜月苦鐵騎曉出冰河裂斷蓬飛葉卷黃沙祇有千林鬢鬆花應爲王孫朝上國珠幢玉節與排衙左援公孝右孟博我居其間嘯且諾僕夫爲我催歸來要與北海春水爭先回

和錢穆父送別并求頓遞酒次韻

聯鑣接武兩長身鶼鷀行中語笑親九子羨君門戶壯八州憐我往來頻佇聞東府開賓閣便乞西湖洗塞塵更向青齊覓消息要知從事是何人

卷四

詩七十首

劉醜齋詩

劉生望都民病羸寄空窯有子曰醜廝十二行操瓢墦間得餘粒雪中拾墮樵飢飽其生死水火同焚漂病翁恃一褐度此積雪宵哀哉二暴客掣去如飢鴟翁旣死於寒客亦易此齟崎嶇走亭長不憚雪徑遙我仇祝與苑物色同遮邀行路爲出涕二客竟就梟譏諷訴我庭慷慨驚吾僚曰此可名寄追配郴之堯恨我非柳子擊節爲爾謠官賜二萬錢無家可歸嬌爲媾他日婦婉然初垂髫洗沐作小史裏頭束其腰筆硯耕學苑戈矛戰天驕壯大隨所好忠孝福可徼相國有折脅封侯或吹簫人事豈易料勿輕此僬僥

題毛女真

露鬢風鬟木葉衣山川良是昔人非祇應閑過商顏老獨自吹簫月下歸

寄餲合刷餅與子由

老人心事日摧頽宿火通紅手自焙小甌短餅良具足稱兒嬌女共燔煨寄君東閣閑蒸栗知我空堂坐畫灰約束家僮好收拾故山梨棗待翁來

次韻子由清汝老龍珠丹

天公不解防癡龍玉函寶方出龍宮雷霆下索無處避逃人先生衣袂中先生不作金椎袖玩世徜徉隱屠酒夜光明月空自投一鍛何勞緯蕭手黃門寡好心易足荆棘不生梨棗熟玄珠白璧兩無求無腥金丹來入腹區區分別笑樂天那知空門不是仙

次韻子由書清汝老所傳秦湘二女圖

春風消冰失瑤玉我本無身安有觸羊生得婦如得風握手一笑未爲辱先生室中無天遊佩環何處鳴

風甌隨魔未必皆魔女。但與分燈遣歸去。胡爲寫真傳世人。更要維摩一轉語。丹元茅茨祇三間。太極老人時往還。點檢凡心早除拂。方平神鞭常使物。

紫團參寄王定國

鎰劙土門口。突兀太行頂。豈惟園紫雲。實自俯倒景。剛風被草木。真氣入茗穎。舊聞人銜芝。生此羊腸嶺。織纖虎豹鬢。蹙縮龍蛇瘦。蠹頭試小嚼。龜息變方騁。矧予明真子。已造浮玉境。清宵月挂戶。半夜珠落井。灰心寧復然。汗喘久已靜。東坡猶故目。北藥致遺秉。欲持一榼根。往有九轉鼎。爲予置齒頰。豈不賢酒茗。

次韻劉巒撫句蜜漬荔支

時新滿座聞名字。別久何人記色香。葉似楊梅蒸霧雨。花如盧橘傲風霜。每憐尊菜下鹽豉。肯與葡萄壓酒漿。回首驚塵卷飛雪。詩情真合與君嘗。

立春日小集呈李端叔

白髮已十載。青春無一堪。不驚新歲換。聊與故人談。牛健民聲喜。鴉嬌雪意酣。霏微不到地。和暖要宜蠶。歲月斜川似。風流曲水慚。行吟老燕代。坐睡夢江潭。丞掾頗哀援。歌呼誰怕參。衰懷久灰槁。習氣尙饑貪。白啖本河朔。紅消真劍南。辛盤得青韭。臘酒是黃柑。歸臥燈殘帳。醒聞葉打庵。須煩李居士。重說後三三。

次韻曾仲錫元日見寄

蕭索東風兩鬢華。年年幡勝翦宮花。愁聞塞曲吹蘆管。喜見春槃得蓼芽。吾國舊供雲澤米。定武齋酒用蘇州米。君家新致雪坑茶。近得曾坑茶。燕南異事真堪記。三寸黃柑擘永嘉。

子由生日以檀香觀音像及新合印香銀篆槃爲壽

栴檀婆律海外芬。西山老臍柏所薰。
香螺脫蠻來相羣。能結縹眇風中雲。
一燈如螢起微熒。何時度盡繆篆紋。
繚繞無窮合復分。絲綿浮空散氤氲。
東坡持是壽卯君。君少與我師皇墳。
旁資老聃釋迦文。共厄中年點蠅蚊。
晚遇斯須何足云。君方論道承華助。
我亦旗鼓嚴中軍。國恩當報敢不勤。
但願不爲世所醺。爾來白髮不可耘。
問君何時返鄉枌。收拾散食理放紛。
此心實與香俱烹。聞思大士應已聞。

次韻李端叔送保倅翟安常赴闕兼寄子由

中山保塞兩窮邊。臥治雍容已百年。
顧我迂愚分竹使。與君談笑用蒲鞭。
松荒三徑思元亮。草合平池憶惠連。
白髮歸心憑說與。古來誰似兩疎賢。

中山松醪寄雄守王引進

鬱鬱蒼髯千歲姿。肯來盃酒作兒嬉。
流芳不待龜巢葉。唐人以荷葉爲酒盃。謂知若箇酒。
掃白聊煩鶴踏枝。醉裏便成欹雪舞。
醒時與作嘯風辭。馬軍走送非無意。
玉帳人閑合有詩。

次韻李端叔謝送牛戢鷺鷺竹石圖

聞君談西戎。廢食忘蚤晚。
王師本不陣。賊壘何足剗。
守邊在得士。此語要而簡。
知君論將口似我識畫眼。
笑指塵壁間。此是老牛戢。
平生師衛玠。非意常理遣。
訴君定何人。未用市朝顯。
置之勿復道。世俗固多舛。
歸去亦何須。單車渡殲澠。
如蟲得羽化。已脫安用蠶。
家書空萬軸。涼曝困舒卷。
念當掃長物。閉息默自暖。
此畫聊付君。幽處得小展。
新詩勿縱筆。羣吠驚邑犬。
時來未可知。妙斲待輪扁。

次韻聰上人見寄

前身本同社宿業獨臨邊。一悟鏡空老。始知圓澤賢。歸心忘犢佩。生術寄羊鞭。不似歐陽子。空留六一泉。

次韻王雄州還朝留別

老李威名八十年。壁間精悍見遺顏。自聞出守風流似。稍覺承平氣象還。但遣詩人歌杕杜。不妨侍女唱陽關。內朝接武知何日。白髮羞歸供奉班。

三月二十日多葉杏盛開

零露滋月華。溫風散晴葩。春工了不睡。連夜開此花。芳心誰翦刻。天質自清華。惱客香有無。弄粧影橫斜。中山古戰國。殺氣浮高牙。叢臺餘絃服。易水雄悲笳。自從此花開。玉肌洗塵沙。坐令游俠窟。化作溫柔家。我老念江海。不飲空咨嗟。明年花開時。舉酒望三巴。蓋欲請梓州而歸也。

三月二十日開園三首

雪鬚霜鬢語猶猶。澹蕩園林取次行。要識將軍不凡意。從來祇啜小人羹。是日散父老酒食。

西園牡籥夜沉沉。尙有游人臥柳陰。鶴睡覺時風露下。落花飛絮滿衣襟。

鬢鬢蒼鬢真道友。絲絲紅萼是鄉人。昔鬢松也。紅萼海棠。何時翠竹江村路。送我柴門月色新。

次韻王雄州送侍其涇州

威聲又數中興年。二虜行當一矢聯。聞道名城得真將。故應驚羽落空弦。追鋒歸去雄三衛。授鉞重來定十連。別酒回頭便陳迹。號呶端合發初筵。

臨城道中作并引

予初赴中山。連日風埃未嘗了了。見太行也。今將適嶺表。頗以是爲恨。過臨城內丘。天氣忽清徹。西望太行。草木可數。岡巒北走。崖谷秀傑。忽悟歎曰。吾南遷其速返乎。退之衡山之祥也。書以付邁使志之。逐客何人。著眼看太行千里。送征鞍未應愚谷能留柳。可獨衡山解識韓。

過湯陰市得豌豆大麥粥示三兒子

朔野方赤地。河濡但黃塵。秋霖暗豆漆。夏旱臞麥人。逆旅唱晨粥。行庖得時珍。青班照七筋。脆響鳴牙齦。玉食謝故吏。風殮便逐臣。漂零竟何適。浩蕩寄此身。爭勸加飲食。實無負吏民。何當萬里客。歸及三年新。子由新修汝州龍興寺吳畫壁

丹青久衰工不蓺。人物尤難到今世。每摹市井作公卿。畫手懸知是徒隸。吳生已與不傳死。那復典刑留近歲。人間幾處變西方。盡作波濤翻海勢。細觀手面分轉側。妙算毫釐得天契。始知真放本精微。不比狂花生客慧。似聞遺墨留汝海。古壁蝸涎可垂涕。力捐金帛扶棟宇。錯落浮雲卷新霽。使君坐獻清夢餘。幾疊衣紋數衿袂。他年弔古知有人。姓名聊記東坡弟。

過高郵寄孫君孚

過淮風氣清。一洗塵埃容。水木漸幽茂。菰蒲雜游龍。可憐夜合花。青枝散紅茸。美人游不歸。一笑當誰供。故園在何處。已偃手種松。我行忽失路。歸夢山千重。聞君有負郭。二頃收橫從。卷野畢秋穫。般牀聞夜春。樂哉何所憂。社酒粥面釀。宦游豈不好。毋令到千鍾。

僕所至未嘗出遊過長蘆聞天禪師病甚不可不一問既見則有間矣明日阻風復留見之作三絕句呈聞復并請轉呈參寥子各賦數首

亦知壺子不死敢問老聃所游瑟瑟寒松露骨耽耽病虎垂頭
莫言西蜀萬里且到南華一游扶病江邊送客杖拏浦口回頭
老去此生一訣興來明日重游臥聞三老白事半夜南風打頭

六月七日泊金陵阻風得鍾山泉公書寄詩爲謝

今日江頭天色惡礳車雲起風欲作獨望鍾山喚寶公林間白塔如孤鶴寶公骨冷喚不聞却有老泉來
喚人電眸虎齒霹靂舌爲子吹散千峯雲南行萬里亦何事一酌曹谿知水味他年若畫蔣山圖爲作泉
公喚居士

贈清涼寺和長老

代北初辭沒馬塵江南來見臥雲人問禪不契前三語施佛空留丈六身老去山林徒夢想雨餘鐘鼓更
清新會須一洗黃茅瘴未用深藏白氈巾

予前後守倅餘杭凡五年夏秋之間蒸熱不可過獨中和堂東南頰下瞰海門洞視萬里三伏常
蕭然也紹聖元年六月舟行赴嶺外熱甚忽憶此處而作是詩

忠孝王家千柱宮東坡作吏五年中中和堂上東南頰獨有人間萬里風

慈湖夾阻風五首

揜索柵竿立嘯空。篠師酣寢浪花中。故應菅蒯知心腹。弱纜能爭萬里風。
此生歸路愈茫然。無數青山水拍天。猶有小船來賣餅。喜聞墟落在山前。
我行都是退之詩。真有人家水半扉。千頃桑麻在船底。空餘石髮挂魚衣。
月輪亭午汗珠融。誰識南訛長養功。暴雨過雲聊一快。未妨明月却當空。
臥看落月橫千丈。起喚清風得半帆。且並水村欹側過。人間何處不巉巖。

過廬山下并引

予過廬山下。雲物騰涌。默有禱焉。未午。衆峯凜然。故作是詩。

亂雲欲霾山勢與。飄風南羣隣相應。和勇往爭驂驛可憐。蒼蔚中時出。紫翠嵐鴈沒。失東嶺龍騰見。西龜一時供坐笑。百態變立談。暴雨破块块。清飈掃渾酣。廓然歸何處。陋矣安足戡。亭亭紫霄峯。窈窕白石庵。五老數松雪。雙谿落天潭。雖云默禱應。顧有移文慚。

壺中九華詩并引

湖口人李正臣蓄異石九峯。玲瓏宛轉。若窗櫺然。予欲以百金買之。與仇池石爲偶。方南遷未暇也。名之曰壺中九華。且以詩記之。

清谿電轉失雲峯。夢裏猶驚翠掃空。五嶺莫愁千嶂外。九華今在一壺中。天池水落層層見。玉女窗明處處通。念我仇池太孤絕。百金歸買碧玲瓏。

江西

江西山水真吾邦。白沙翠竹石底江。舟行十里磨九灘。篙聲犧礎相春撞。醉臥欲醒聞淙淙。真欲一口吸老龐。何人得僞窺魚矼。舉叉絕叫尺鯉雙。

秧馬歌并引

過廬陵見宣德郎致仕曾君安止出所作禾譜文既溫雅事亦詳實惜其有所缺不譜農器也予昔游武昌見農夫皆騎秧馬以榆棗爲腹欲其滑以楸桐爲背欲其輕腹如小舟昂其首尾背如覆瓦以便兩脾雀躍于泥中繫束藁其首以縛秧日行千畦較之傴僂而作者勞佚相絕矣史記禹乘四載泥行乘橇解者曰橇形如箕擿行泥上豈秧馬之類乎作秧馬歌一首附于禾譜之末云

春雲濛濛雨淒淒春秧欲老翠剝齊嗟我婦子行水泥朝分一壠莫千畦腰如箜篌首啄雞筋煩骨殆聲酸嘶我有桐馬手自提頭尻軒昂腹脅低背如覆瓦去角圭以我兩足爲四蹄聳踊滑汰入聲如鳬鷺纖纖束藁亦可齋何用繁縟與月題竭從畦東走畦西山城欲閉聞鼓鼙忽作的盧躍檀溪歸來挂壁從高栖了無芻秣飢不啼少壯騎汝逮老黧何曾蹶軼防顚擠錦韁公子朝金闈笑我一生蹋牛犁不知自有木駄驥

八月七日初入贛過惶恐灘

七千里外二毛人十八灘頭一葉身山憶喜歡勞遠夢蜀道有錯喜歡鋪在大散關上地名惶恐泣孤臣長風送客添帆腹積雨扶舟減石鱗便合與官充水手此生何止略知津

鬱孤臺以下四首皆虔州

入境見圖畫，鬱孤如舊游。山爲翠浪涌，水作玉虹流。日麗崆峒曉，風酣章貢秋。丹青未變葉，鱗甲欲生洲。
嵐氣昏城樹，灘聲入市樓。煙雲侵嶺路，草木半炎州。故國千峯外，高臺十日留。他年三宿處，準擬繫歸舟。

廉泉

水性故自清，不清或撓之。君看此廉泉，五色爛塵尼。廉者爲我廉，我以此名爲。有廉則有貪，有慧則有癡。
誰爲柳宗元，孰是吳隱之。漁父足豈潔，許由耳何淄。紛然立名字，此水了不知。毀譽有時盡，不知無盡時。
竭來廉泉上，捋須看鬚眉。好在水中人，到處相嬉嬉。

塵外亭

楚山澹無塵，贛水清可厲。散策塵外游，塵手謝此世。山高惜人力，十步輒一憩。却立浮雲端，俯視萬井麗。
幽人宴坐處，龍虎爲斬薙。馬駒獨何疑，豈墮山鬼計。夜垣非助我，謬敬欲其逝。戲留一轉語，千載起攘袂。

天竺寺并引

予年十二先君自虔州歸爲予言近城山中天竺寺有樂天親書詩云一山門作兩山門兩寺元從一寺分東澗水流西澗水南山雲起北山雲前臺花發後臺見上界鐘清下界聞遙想吾師行道處天香桂子落紛紛筆勢奇逸墨迹如新今四十七年矣予來訪之則詩已亡有刻石存耳感涕不已而作是詩
香山居士留遺迹天竺禪師有故家空詠連珠吟疊璧已亡飛鳥失驚蛇林深野桂寒無子雨浥山蘂病
有花四十七年真一夢天涯流落涕橫斜

過大庾嶺

一念失垢汙。身心洞清淨。浩然天地間。惟我獨也正。今日嶺上行。身世永相忘。仙人拊我頂。結髮授長生。

宿建封寺曉登盡善亭望韶石三首

雙闕浮空照短亭。至今猿鳥獻青焚。君王自此西巡狩。再使魚龍舞洞庭。
蜀人文賦楚人辭。堯在崇山舜九疑。聖主若非真得道。南來萬里亦何爲。

嶺海東南月窟西。功成天已錫玄珪。此方定是神仙宅。禹亦東來隱會稽。

月華寺寺隣岑水場施者皆坑戶也百年間蓋三焚矣

天公胡爲不自憐。結土融石爲銅山。萬人採斲富媼泣。祇有金帛資豪姦。脫身獻佛意可料。一瓦坐待千
金還。月華二火豈天意。至今芟舍依榛菅。僧言此地本龍象。興廢反掌曾何難。高巖夜吐金碧氣。曉得異
石青爛斑。坑流窟發錢涌地。莫施百鑑朝千鋟。此山出寶以自賊。地脈已斷天應懼。我願銅山化南畝。爛
漫黍麥蘇惇鰥道人修道要底物。破鐺煮飯茆三間。

南華寺

云何見祖師。要識本來面。亭亭塔中人。問我何所見。可憐明上座。萬法了一電飲水。旣自知。指月無復眩。
我本修行人。三世積精練。中間一念失。受此百年譴。摶衣禮真相。感動淚雨霰。借師錫端泉。洗我綺語硯。

碧落洞在英州下十五里

槎牙亂峯合。晃蕩絕壁橫。遙知紫翠間。古來仙釋并。陽崖射朝日。高處連玉京。陰谷扣白月。夢中遊化城。
果然石門開。中有銀河傾。幽龕入窈窕。別戶穿虛明。泉旒下珠琲。乳蓋交縵纓。我行畏人知。恐爲仙者迎。

小語輒響答。空山自雷驚。策杖歸去來。治具煩方平。

峽山寺傳奇所記孫恪袁氏事。卽此寺至今有人見白猿者。

天開清遠。峽地轉凝碧。灣我行無遲速。攝衣步孱顏。山僧本幽獨。乞食況未還。雲碓水自春。松門風爲闕。石泉解娛客。琴筑鳴空山。佳人劍翁孫。遊戲暫人間。忽憶嘯雲侶。賦詩留玉環。林空不可見。霧雨羈鬢髮。舟行至清遠。縣見顧秀才。極談惠州風物之美。到處聚觀香案吏。此邦宜着玉堂仙。江雲漠漠桂花溼。海雨翛翛荔子然。聞道黃柑常抵鵠。不容朱橘更論錢。恰從神虎來。弭景便向羅浮見。稚川。

廣州蒲澗寺地產菖蒲十二節。相傳安期生之故居。始皇訪之於此。

不用山僧導我前。自尋雲外出。山泉千章古木臨無地。百尺飛濤漏漏天。舊日菖蒲方士宅。後來詹葛祖師禪。而今祇有花含笑。笑道秦皇欲學仙。山中多含笑花。

贈蒲澗信長老

優鉢曇花豈有花。問師此曲唱誰家。已從子美得桃竹。此山有桃竹可作杖。而土人不識。予始錄子美詩。遺之。不向安期覓棗瓜。燕坐林間時有虎。高眠粥後不聞鴉。勝遊自古兼支許。爲採松肪寄一車。

發廣州

朝市日已遠。此身良自如。三杯軟飽後。漸人謂飲酒爲軟飽。一枕黑甜餘。俗謂睡爲黑甜。蒲澗疎鐘外。黃灣落木初。天涯未覺遠。處處各樵漁。

浴日亭在南海廟前。

劍氣崢嶸夜插天。瑞光明滅到黃灣。坐看陽谷浮金暈。遙想錢塘涌雪山。已覺滄涼蘇病骨。更煩沆瀣洗衰顏。忽驚鳥動行人起。飛上千峯紫翠間。

遊羅浮山一首示兒子過

人間有此白玉京。羅浮見日雞一鳴。南樓未必齊日觀。鬱儀自欲朝朱明。劉夢得有詩記羅浮夜半見日事。山不甚高而夜見日。此可異也。山有二石樓。今延祥寺在南樓下。朱明洞在冲虛觀後。云是蓬萊第七洞天。東坡之師抱朴老。真契蚤已交前生。玉堂金馬久流落。寸田尺宅今歸耕。道華亦嘗啖一棗。唐永樂道士侯道華。竊食鄖天師藥仙去。永樂有無核棗。人不可得。道華獨得之。予在岐下亦嘗得食一枚。契虛正欲仇三彭。唐僧契虛遇人導游稚川仙府。真人問曰。汝絕三彭之仇乎。契虛不能答。鐵橋石柱連空橫。山有鐵橋石柱。人罕至者。杖藜欲趁飛猱輕。雲谿夜逢瘞虎伏。山有啞虎巡山。斗壇畫出銅龍窟。冲虛觀後有朱真人朝斗壇。近於壇上獲銅龍六。銅魚一。小兒少年有奇志。中宵起坐存黃庭。近者戲作凌雲賦。筆勢髣髴離騷經。負書從我盍歸去。羣仙正革新宮銘。汝應奴隸蔡少霞。我亦季孟山玄卿。唐有夢書新宮銘者。云紫陽真人山玄卿撰。其略曰。良常西麓。原澤東澗。新宮宏宏。崇軒懶惄。又有蔡少霞者。夢人遺書碑略曰。公昔乘魚車。今履瑞雪。躅空仰塗。綺輶輪囷。其末題云。五雲書閣吏蔡少霞書。還須略報老子。叔羸糧萬里尋初平。子由一字同叔。

十月二日初到惠州

鬚髮曾遊豈夢中。欣然雞犬識新豐。吏民驚怪坐何事。父老相攜迎此翁。蘇武豈知還漠北。管寧自欲老遼東。嶺南萬戶皆春色。嶺南萬戶酒會有幽人客寓公。

寓居合江樓

海山葱蘢氣佳哉。二江合處朱樓開。蓬萊方丈應不遠。肯爲蘇子浮江來。江風初涼睡正美。樓上啼鴉呼我起。我今身世兩相違。西流白日東流水。樓中老人日清新。天上豈有癡仙人。三山咫尺不歸去。一盃付與羅浮春。予家釀酒名羅浮春。

白水山佛迹巖一首羅浮之東麓也在惠州東北二十里

何人守蓬萊。夜半失左股。浮山若鵬蹲。忽展垂天羽。根株互連絡。崖嶠爭吞吐。神工自爐鑄。融夜相綴補。至今餘隙罅。流出千斛乳。方其吹合時。天匠靡月斧。帝觴分餘瀝。山骨醉后土。峯巒尙開闊。澗谷猶呼舞。海風吹未凝。古佛來布武。當時汪岡氏。投足不蓋拇。青蓮雖不見。千古落花雨。雙谿匯九折。萬馬騰一鼓。奔雷濺玉雪。潭洞開水府。潛鱗有飢蛟。掉尾取渴虎。我來方醉後。濯足聊戲侮。回風卷飛雹。掠面過強弩。山靈莫惡劇。微命安足賭。此山吾欲老。慎勿厭求取。谿流變春酒。與我相賓主。當連青竹竿。下灌黃精圃。詠湯泉在白水山。

積火焚大槐。蓄油災武庫。驚然丞相井。疑浣將軍布。自憐耳目隘。未測陰陽故。鬱攸火山裂。觱沸湯泉注。豈惟渴獸駭。坐使癡兒怖。安能長魚鼈。僅可尋狐兔。山中惟木客。戶外時芒屨。雖無傾城洛。幸免亡國汙。

自笑

予石如琢玉。遠煙真削鑿。入我病風手。古語云。磨墨如病風手。玄雲滄淒淒。是中何有好。而我喜欲迷。旣似蠟屐阮。又如鍛柳嵇。醉筆得天全。宛宛天投霓。多謝中書君。伴我此幽栖。

朝雲詩并引

世謂樂天有粥駱馬放楊柳枝詞。嘉其主老病不忍去也。然夢得有詩云。春盡絮飛留不得。隨風好去落誰家。樂天亦云。病與樂天相伴住。春隨樊子一時歸。則是樊素竟去也。予家有數妾。四五年相繼辭去。獨朝雲者。隨予南遷。因讀樂天集。戲作此詩。朝雲姓王氏。錢塘人。嘗有子曰幹兒。未期而夭。云不似楊枝別樂天。恰如通德伴伶玄。阿奴絡秀不同老。天女維摩總解禪。經卷藥爐新活計。舞衫歌扇舊因緣。丹成逐我三山去。不作巫陽雲雨仙。

寄虎兒

獨倚桄榔樹。閑挑草撥根。謀生看拙否。送老比蠻村。

十一月二十六日松風亭下梅花盛開

春風嶺上淮南村。昔年梅花曾斷魂。予昔赴黃州。清風嶺上見梅花。有兩絕句。明年正月往岐亭道中。賦詩云。去年今日闢山路。細雨梅花正斷魂。豈知流落復相見。蟹風蠻雨愁黃昏。長條半落荔支浦。臥樹獨秀桄榔園。豈惟幽光留夜色。直恐冷豔排冬溫。松風亭下荆棘裏。兩株玉蕊明朝瞰。海南仙雲嬌墮砌。月下縞衣來扣門。酒醒夢覺起繞樹。妙意有在終無言。先生獨飲勿歎息。幸有落月窺清樽。

再用前韻

羅浮山下梅花村。玉雪爲骨冰爲魂。紛紛初疑月挂樹。耿耿獨與參橫昏。先生索居江海上。悄如病鶴栖荒園。天香國豔肯相顧。知我酒熟詩清溫。蓬萊宮中花鳥使。綠衣倒挂扶桑暾。抱叢窺我方醉臥。故遣啄木先敲門。麻姑過君急洒掃。鳥能歌舞花能言。酒醒人散山寂寂。惟有落葉黏空樽。嶺南珍禽有倒挂子綠毛紅喙。如鸚鵡而小。自海東來。非塵埃間物也。

新釀桂酒

擣香篩辣入餅盆。益盎春谿帶雨渾。收拾小山藏社甕。招呼明月到芳樽。酒材已遣門生致。菜把仍叨地主恩。爛煮葵羹斟桂醑。風流可惜在蠻村。

惠守詹君見和復次韻

已破誰能惜餌盆。頹然醉裏得全渾。欲求公瑾一囷米。試滿莊生五石樽。三盃卯困忘家事。萬戶春濃感國恩。刺史不須邀半道。籃輿未暇走山村。

花落復次前韻

玉妃謫墮煙雨村。先生作詩與招魂。人間草木非我對。奔月偶桂成幽昏。闔香入戶尋短夢。青子綴枝留小園。披衣連夜喚客飲。雪膚滿地聊相溫。松明照坐愁不睡。井花入腹清而噉。先生年來六十化。道眼已入不二門。多情好事真習氣。惜花未忍終無言。留連一物吾過矣。笑領百罰空罍樽。

卷五

詩六十七首

江郊并引

惠州歸善縣治之北數百步抵江少西有盤石小潭可以垂釣作江郊詩云
江郊葱蘢雲水蒨絢崎岸斗入洄潭輪轉先生悅之布席間燕初日下照潛鱗俯見意釣忘魚樂此竿綫
優哉悠哉玩物之變

詹守攜酒見過用前韻作詩聊復和之

箕踞狂歌老瓦盆燎毛燔肉似羌渾傳呼草市來攜客酒掃漁磯共置樽山下黃童爭看舞江干白骨已
銜恩時詹方議葬暴骨孤雲落日西南望長羨歸鴉自識村

寄鄧道士并引

羅浮山有野人相傳葛穉川之隸也鄧道士守安山中有道者也嘗於庵前見其足迹長二尺許紹聖二
年正月十日予偶讀韋蘇州寄全椒山中道士詩云今朝郡齋冷忽念山中客澗底束荆薪歸來煮白石
遙持一樽酒遠慰風雨夕落葉滿空山何處尋行迹乃以酒一壺仍依蘇州韻作詩寄之云
一盃羅浮春遠餉採薇客遙知獨酌罷醉臥松下石幽人不可見清嘯聞月夕聊戲庵中人空飛本無迹

上元夜

前年侍玉輦端門萬枝燈璧月挂罘罳珠星綴瓠稜去年中山府老病亦宵興牙旗穿夜市鐵馬響春冰
今年江海上雲房寄山僧亦復舉膏火松間見層層散策桄榔林林疎月鬚鬢使君置酒罷簫鼓專松陵

狂生來索酒。賈道人也。一舉輒數升。浩歌出門去。我亦歸。嘵。驚。

正月二十四日與兒子過賴仙芝玉原秀才僧曇顥行全道士何寧一同游羅浮道院及栖禪精舍過作詩和其韻寄遇迨

斷橋隔勝踐。脫屨欣小揭。瘴花已繁紅。官柳猶疎細。斜川二三子。悼歎吾年逝。淒涼羅浮館。風壁頽雨砌。黃冠常苦飢。迎客羞破袂。仙山在何許。歸鶴時墮毳。崎嶇拾松黃。欲救齒髮弊。坐令禪客笑。一夢等千歲。栖禪晚置酒。蠻果粲蕉荔。齋廚釜無羹。野餉籃有蕙。嬉游趁時節。俯仰了此世。猶當洗業障。更作臨水禊。寄書陽羨兒。并語長頭弟。門戶各努力。先期畢租稅。

正月二十六日偶與數客野步嘉祐僧舍東南予人家雜花盛開扣門求觀主人林氏媼出應白髮青裙少寡獨居三十年矣感歎之餘作詩記之

縹蒂細枝出絳房。綠陰青子送春忙。涓涓泣露紫含笑。焰焰燒空紅拂桑。落日孤煙知客恨。短籬破屋爲誰香。主人白髮青裙袂。子美詩中黃四娘。

龍尾石硯寄猶子遠

皎皎穿雲月。青青出水荷。文章工點勑。忠義老研磨。偉節何須怒。寬饒要少和。吾衰此無用。寄與小東坡。遠爲人類予。

贈王子直秀才

萬里雲山一破裘。杖端閑挂百錢游。五車書已留兒讀。二頃田應爲鶴謀。水底笙歌蛙兩部。山中奴婢橘

千頭幅巾我欲相隨去海上何人識故侯

次韻表兄程正輔江行見桃花

曲士賦懷沙草木傷莽莽德人無荆棘坐失嶺嶠阻我兄瑚璉姿流落瘴江浦淨眼見桃花紛紛墮紅雨蕭然振衣械笑問散花女我觀解語花粉色如黃土一言破千偈況爾初不語可憐一轉話他日如何舉故復此微吟聊和鷗鷺江邊閑草木閑客當爲主爾來子美瘦正坐作詩苦袖手焚筆硯清篇真漫與願兄理北轍六轡去如組上林桃花開水暖鴻北翥

追餞正輔表兄至博羅賦詩爲別

孤臣南游墮黃菅君亦何事來牧蠻艤舟蟹戶龍岡窟置酒榔葉桄榔間高談已笑衰語陋傑句尤覺清詩孱博羅小縣僧舍古我不忍去君忘還君應回望秦與楚夢涉漢水愁秦關我亦坐念高安客神游黃蘖參洞山何時曠蕩洗瑕謫與君歸駕相追攀梨花寒食隔江路兩山遙對雙烟鬟歸耕不用一錢物惟要兩腳飛孱顏玉牀丹鑲記分我助我金鼎光爛斑

再用前韻賦一首

樂天霜鬢如霜菅始知謝遣素與蠻我兄綠髮蔚如故已了夢幻齊人間蛾眉勸酒聊爾耳處仲太忍茂弘孱三盃徑醉便歸臥海上知復幾往還連娟六么趁蹋鞠杳眇三疊繁陽關酒醒夢斷何所有落花流水空青山忽驚鐃鼓發半夜明月不許幽人攀贈行無物惟一語莫遣瘴霧侵雲鬟羅浮道人一傾蓋欲繫白日留君顏應知我是香案吏他年許綴蓬萊班

真一酒井引

米麥水三一而已。此東坡先生真一酒也。

撥雪披雲得乳泓。蜜蠶又欲醉先生。真一色味頗類予在黃州日所釀蜜酒也。稻垂麥仰陰陽足。器絜泉新表裏。清曉日着顏紅有暈。春風入髓散無聲。人間真一東坡老。與作青州從事名。

游博羅香積寺并引

寺去縣七里。三山犬牙夾道皆美田。麥禾甚茂。寺下谿水可作碓磨。若築塘百步。閘而落之。可轉兩輪舉四杵也。以屬縣令林朴使督成之。

二年流落鼈魚鄉。朝來喜見麥吐芒。東風搖波舞淨綠。初日泫露酣嬌黃。汪汪春泥已沒膝。剝剝秋穀初分秧。誰言萬里出無友。見此二美喜欲狂。三山屏擁僧舍小。一谿雷轉松陰涼。要令水力供臼磨。與相地脈增隄防。霏霏落雪看收麪。隱隱疊鼓聞春糠。散流一啜雲子白。炊裂十字瓊肌香。豈惟牢九薦古味。東晉餅賦云。漫頭薄持起搜牢。九要使真一流仙漿。詩成捧腹便絕倒。書生說食真膏肓。

次韻定慧欽長老見寄八首

蘇州定慧長老守欽。使其徒卓契順來惠州。問予安否。且寄擬寒山十頌語。有粲忍之通。而詩無島可之。寒吾甚嘉之。爲和八首。

左角看破楚。南柯聞長滕。鈎簾歸乳燕。穴紙出凝蠅。爲鼠常留飯。憐蛾不點燈。崎嶇真可笑。我是小乘僧。鐵橋本無柱。石樓豈有門。舞空五色羽。吠雲千歲根。松花釀仙酒。木客餽山殮。我醉君且去。陶云吾亦云。

羅浮高萬仞。下看扶桑卑。默坐朱明洞。玉池自生肥。從來性坦率。醉語漏天機。相逢莫相問。我不記吾誰。
幽人白玉觀。大士甘露滅。根塵各清淨。心境兩奇絕。真源未純熟。習氣餘陋劣。譬如已放鷹。中夜時掣繩。
誰言窮巷士。乃竊造物權。所見皆我有。安居受其全。戲作一篇書。千古發爭端。儒墨起相殺。予初本無言。
閒居蓄百毒。救彼跛與盲。依山作陶穴。掩此暴骨橫。區區效一溉。豈能濟含生。力惡不已出。時哉非汝爭。
少壯欲及物。老閑餘此心。微生山海間。坐受瘴霧侵。可憐鄧道士。攝衣問呻吟。覆舟却私渡。斷橋費千金。
淨名毘耶中。妙喜恆沙外。初無往來相。二士同一在。云何定慧師。尙欠行腳債。請判維摩憑。一到東坡界。

三月十九日攜白酒鱸魚過詹史君食槐葉冷淘

枇杷已熟粲金珠。桑落初嘗灑玉蛆。暫借垂蓮十分璣。一澆空腹五車書。青浮卵盤槐芽餅。紅點冰槃藿葉魚。醉飽高眠真事業。此生有味在三餘。

江漲用過韻

草木生故墟。牛羊滿空瀆。春江圍草市。夜浪浮竹屋。已連漲海白。尙帶霍山綠。坎離更休王。魚鼈橫陵陸。
得非崑崙囚。欲報陸渾鯀。行看北風競。來救南國蹙。長驅連山燒。一掃含沙毒。孤吟愍造化。何時停倚伏。
當憐水旱氓。不作舟車蓄。江流儻席卷。社酒期茆縮。

連雨江漲二首

越井岡頭雲出山。牂柯江上水如天。牀牀避漏幽人屋。浦浦移家艇子船。龍卷魚鰐并雨落。人隨雞犬上牆眠。祇應樓下平塘水。長記先生過嶺年。

急雨蕭蕭作晚涼，臥聞榕葉響長廊。微明燈火耿殘夢，半溼簾帷浥舊香。高浪隱牀吹簷盃，闌風驚樹擺琳琅。先生不出晴無用，留向空堦滴夜長。

四月十一日初食荔支

南村諸楊北村盧。謂楊梅盧橘也。白花青葉冬不枯，垂黃綴紫煙雨裏。特與荔支爲先驅，海山仙人絳羅襦。紅紗中單白玉膚，不須更待妃子笑。風骨自是傾城姝，不知天工有意無。遣此尤物生海隅，雲山得伴松檜老。霜雪自困楂梨麌，先生洗殘酌桂醑。冰槃薦此頰虬珠，似開江鯢斫玉柱。更洗河豚烹腹腴，予嘗謂荔支厚味高格兩絕，果中無比。惟江鯢柱河豚魚近之耳。我生涉世本爲口，一官久已輕尊鱸。人間何者非夢幻，南來萬里真良圖。

桄榔杖寄張文潛

一首時初聞黃魯直遷黔南范淳父九疑也

睡起風清酒在亡，身隨殘夢兩茫茫。江邊曳杖桄榔瘦，林下尋苗草撥香。獨步儻蓬岣嶺令遠來，莫恨曲江張。遙知魯國真男子，猶憶平生盛孝章。

答周循州

蔬飯藜牀破衲衣，掃除習氣不吟詩。前生似是廬行者，後學過呼韓退之。未敢扣門求夜話，時叨送米續晨炊。知君清俸難多輟，且覓黃精與療飢。

次韻程正輔游碧落洞

空山不難到，絕境未易名。何時謫仙人，來作鈞天聲。胸中幾雲夢，餘地方恢宏。長庚與北斗，錯落綴冠纓。

黃公獻紫芝，赤松餽青精。
谿山久寂寞，請續離騷經。
抱枝寒蜩咽，繞耳飛蚊清。
謫仙拊掌笑，笑此羽皇銘。
我頃嘗獨游，自適孤雲情。
君今又繼往，霧雨愁青冥。
感君兄弟意，尋羊問初平。
玉牀分箭鏃，不忍獨長生。
詩成輒寄我，妙絕陶謝并。
孤鴻方避弋，老驥猶在坰。
鳥獸如可羣，永寄槁木形。
何山不堪隱，飲水自脩齡。

六月十二日酒醒步月理髮而寢

羽蟲見月爭翻飈，我亦散髮虛明軒。
千梳冷快肌骨醒，風露氣入霜蓬根。
起舞三人漫相屬，停盃一問終無言。
曲肱薤簟有佳處，夢覺瓊樓空斷魂。

荔支歎

十里一置飛塵灰，五里一候兵火催。
顛坑仆谷相枕藉，知是荔支龍眼來。
飛車跨山鶴橫海，風枝露葉如新採。
宮中美人一破顏，驚塵濺血流千載。
永元荔支來交州，天寶歲貢取之涪。
至今欲食林甫肉，無人舉觴醉伯游。
漢永元中交州進荔支龍眼十里一置五里一候奔馳死亡罹猛獸毒蟲之害者無數唐羌字伯游爲臨武長上書言狀和帝罷之唐天寶中蓋取涪州荔支自子午谷路進入我願天公憐赤子莫生尤物爲瘡痏君不見武夷谿邊粟粒芽前丁後蔡相籠加爭新買寵各出意今年鬪品充官茶吾君所乏豈此物致養口體何陋耶洛陽相君忠孝家可憐亦進姚黃花洛下貢花自錢惟演始大小龍茶始於丁晉公而成於君謨歐陽永叔聞君謨進小龍團驚歎曰君謨士人也何至作此事今年閩中監司乞進國茶許之

江月五首并引

嶺南氣候不常吾嘗云菊花開時乃重陽涼天佳月卽中秋不須以日月爲斷也今歲九月殘暑方退旣望之後月出愈遲然予常夜起登合江樓或與客游豐湖入栖禪寺扣羅浮道院登逍遙堂逮曉乃歸杜子美云四更山吐月殘夜水明樓此殆古今絕唱也因其句作五首仍以殘夜水明樓爲韻

一更山吐月玉塔臥微瀾正似西湖上涌金門外看冰輪橫海闊香霧入樓寒停鞭且莫上照我一盃殘
二更山吐月幽人方獨夜可憐人與月夜夜江樓下風枝久未停露草不可藉歸來掩關臥唧唧蟲夜話
三更山吐月栖鳥亦驚起起尋夢中游清絕正如此驅雲掃衆宿俯仰迷空水幸可飲我牛不須違洗耳
四更山吐月皎皎爲誰明幽人赴我約坐待玉繩橫野橋多斷板山寺有微行今夕定何夕夢中游化城
五更山吐月窗迴室幽幽玉鈎還挂戶江練却明樓星河澹欲曉鼓角冷知秋不眠翻五詠清切變蠻謳

聞正輔表兄將至以詩迎之

生逢堯舜仁得作嶺海游雖懷跫然喜豈免跔跕憂莫雨侵重腿曉烟騰鬱攸朝槃見蜜唧夜枕聞鳩鵠
幾欲烹鬱屈固嘗饌鉤軻舌音漸獠變面汗嘗醉羞賴我存黃庭有時仍丹丘目聽不任耳踵息殆廢喉
稍欣素月夜遂度黃茆秋我兄清廟器持節瘴海頭蕭然三家步橫此萬斛舟人言得漢吏天遣活楚囚
惠然再過我樂哉十日留但恨三語賢忽潛九原幽萬里儻同歸兩鰥當對耰賦喪婦已三年矣正輔近
亦有亡嫂之感故云強歌非真達何必師莊周

再和

稚川真長生少從鄭公游孝章偶不死免爲文舉憂餘齡會有適獨往豈相攸由來警露鶴不羨撮蚤鷁

願加視後鞭同駕躅空輶寧殮墮齒堇勿憶齊眉羞何時遂縱壑歸路同首丘著意尋彌明長頸高結喉東岡松柏老西嶺橘柚秋無心逐定遠燕領飛虎頭君方卒功名一泛范蠡舟我亦沾沛渥漸解鍾儀囚寧須張子房萬戶自擇留猶勝嵇叔夜孤憤甘長幽南窗可寄傲北山早歸耰此語君勿疑老彭跨商周

同正輔表兄游白水山

偉哉造物真豪縱攫土搏沙爲此弄擘開翠峽走雲雷截破奔流作潭洞因隨化人履巨迹得與仙兄躡飛鞚曳杖不知巖谷深穿雲但覺衣裘重坐看驚鳥救霜葉知有老蛟蟠石礪金沙玉礫粲可數古鏡寶奩寒不動念兄獨立與世疎絕境難到惟我共永詞角上兩蠻觸一洗胸中九雲夢浮來山高回望失武陵路絕無人送筠籃擷翠爪甲香素綆分碧銀餅凍歸路霏霏湯谷暗野堂活活神泉涌解衣浴此無垢人身輕可試雲間鳳

與正輔游香積寺

越山少松竹常苦野火厄此峯獨蒼然感荷佛祖力伏苓無人採千歲化琥珀幽光發中夜見者惟木客我豈無長鑑真贗苦難識靈苗與毒草疑似在毫髮把玩竟不食棄置長太息山僧類有道辛苦常谷汲我慚作機春鑿破混沌穴幽尋恐不繼書板記歲月

次韻正輔同游白水山

祇知楚越爲天涯不知肝膽非一家此身如綫自縛繞左回右轉隨纏車誤拋山林入朝市平地咫尺千裏邪欲從穉川隱羅浮先與靈運開永嘉首參虞舜款韶石次謁六祖登南華仙山一見五色羽雪樹兩

摘南枝花赤魚白蟹筋屢下黃柑綠橘籩常加糖霜不待蜀客寄荔支莫信閩人誇恣傾白蜜收五稜去聲細斲黃土栽三桺正輔分人參一苗歸種韶陽來詩本用字惠州無書不見此字所出故且從木奉和
朱明洞裏得靈草翩然放杖凌蒼霞豈無軒車駕熟鹿亦有鼓吹號寒蛙仙人勸酒不用勺石上自有樽
罍窪徑從此路朝玉闕千里莫遣毫釐差故人日夜望我歸相迎欲到長風沙豈知乘槎天女側獨倚雲
機看織紗世間誰似老兄弟篤愛不復相疵瑕相攜行到水窮處庶幾一見留子嗟千年枸杞常夜吠無
數草棘工藏遮但令凡心一洗濯神人仙藥不我遐山中歸來萬想滅豈復回顧雙雲鴉

轍有白髮近二十年矣然止百餘莖不增不減虔州道人王正彥教令拔去以真水火養之恐不
復更生從其言已數月而白髮不出更年歲不見豈真不生耶子瞻兄示我月中梳頭詩戲次來

韻言拔白之驗

水上有車車自翻懸流如線垂前軒霜蓬已枯不再綠有客勸我抽其根根根一去紫茸苗珍重已試幽
人言紛紛華髮不足道當返六十過去魂

和

夏畦流膏白雨翻北窗幽人臥羲軒風輪曉入春筍節露珠夜上秋禾根或爲予言草木之長常在昧明
間蚤作而伺之乃見其枝起數寸竹笋尤甚又夏秋之交稻方含秀黃昏月出露珠起於其根纍纍然忽
自騰上若有推之者或入于莖心或垂于葉端稻乃秀實驗之信然此二事與予由養生之說契故以此
爲寄從來白髮有公道始信丹經非妄言此身法報本無二他年妙絕兼形魂傳燈錄有形神俱妙者乃

不復□解化之事。

十一月九日夜夢與人論神仙道術因作一詩八句既覺頗記其語錄呈子由弟後四句不甚明了今足成之耳

析塵妙質本來空。夢中於此句。若了然有所得者。更積微陽一綫功。照夜一燈長耿耿。閉門千息自濛濛。養成丹竈無煙火。點盡人間有暈銅。寄語山神停伎倆。不聞不見我何窮。

章質夫送酒六壺書至而酒不達戲作小詩問之

白衣送酒舞淵明。急掃風軒洗破觥。豈意青州六從事。化爲烏有一先生。空煩左手持新蟹。漫繞東籬鶴落英。南海使君今北海。定分百榼餉春耕。

小圃五詠

人參

上黨天下脊。遼東真井底。玄泉傾海腴。白露洒天醴。靈苗此孕毓。肩肢或具體。移根到羅浮。越水灌清泚。地殊風雨隔。臭味終祖禰。青檉綴紫萼。圓實墮紅米。窮年生意足。黃土手自啓。上藥無炮炙。齧齧盡根抵。開心定魂魄。憂恚何足洗。糜身輔吾生。旣食首重稽。

地黃

地黃飼老馬。可使光鑒人。吾聞樂天語。喻馬施之身。我衰正伏櫪。垂耳氣不振。移栽附沃壤。蕃茂爭新春。沈水得穉根。重湯養陳薪。投以東阿清。和以北海醇。崖蜜助甘冷。山薑發芳辛。融爲寒食餳。嚙作瑞露珍。

丹田自宿火渴肺還生津願餉內熱子一洗胸中塵

枸杞

神藥不自閼羅生滿山澤日有牛羊憂歲有野火厄越俗不好事過眼等茨棘青荑春自長絳珠爛莫摘短籬護新植紫筍生臥節根莖與花實收拾無棄物大將玄吾鬢小則餉我客似聞朱明洞中有千歲質靈厖或夜吠可見不可索仙人儻許我借杖扶衰疾

甘菊

越山春始寒霜菊晚愈好朝來出細粟稍覺芳歲老孤根蔭長松獨秀無衆草晨光雖照耀秋雨半摧倒先生臥不出黃葉紛可掃無人送酒壺空腹嚼珠寶香風入牙頰楚些發天藻新荑蔚已滿宿根寒不槁揚揚弄芳蝶生死何足道頗訝昌黎翁恨爾生不蚤

薏苡

伏波飯薏苡禦瘴傳神良能除五谿毒不救讒言傷讒言風雨過瘴癘久亦亡兩俱不足治但愛草木長草木各有宜珍產駢南荒絳囊懸荔支雪粉剖桄榔不謂蓬荻姿中有藥與糧春爲芡珠圓炊作菰米香子美拾橡栗黃精誑空腸今吾獨何者玉粒照生光

雨後行菜

夢回聞雨聲喜我菜甲長平明江路溼並岸飛雨漿天公真富有膏乳瀉黃壤霜根一蕃滋風葉漸俯仰未任筐筥載已作盃案想艱難生理窄一味敢專饗小摘飯山僧清安寄真賞芥藍如菌蕈脆美牙頰響

白崧類羔豚，冒土出蹯掌。誰能視火候，小竈當自養。

殘臘獨出二首

幽尋本無事，獨往意自長。釣魚豐樂橋，採杞逍遙堂。羅浮春欲動，雲日有清光。處處野梅開，家家臘酒香。路逢眇道士，疑是左元放。我欲從之語，恐復化爲羊。

江邊偶微行，詰曲背城市。平湖春草合，步到栖禪寺。堂空不見人，老稚掩關睡。所營在之食，食已寧復事。客來豈無得，施子淨掃地。風松獨不靜，送我作鼓吹。

新年五首

曉雨暗人日，春愁連上元。水生挑菜渚，煙溼落梅村。小市人歸盡，孤舟鶴蹋翻。猶堪慰寂寞，漁火亂黃昏。
北渚集羣鷺，新年何所之。盡歸喬木寺，分占結巢枝。生物會有役，謀身各及時。何當禁畢弋，看引雪衣兒。
海國空自暖，春山無限清。冰谿結瘴雨，雪菌到江城。更待輕雷發，先催凍筍生。豐湖有藤菜，似可敵蓴羹。
小邑浮橋外，青山石岸東。茶槍燒後有，麥浪水前空。萬戶不禁酒，三年真識翁。結茆來此住，歲晚有誰同。
荔子幾時熟，花頭今已繁。探春先揀樹，買夏欲論園。居士常攜客，參軍許扣門。明年更有味，懷抱帶諸孫。

二月八日與黃蘊僧疊穎過逍遙堂何道士宗一問疾

安心守玄牝，閉眼覓黃庭。問疾來三士，澆愁有半餅。風松時落葉，病鶴不梳翎。樽空我歸去，山月照君醒。

次韻高要令劉湜峽山寺見寄

新聞妙無多，舊學閑可束。猶當隱季生，未遽逃梅福。空腸吐餘思，靜似蠶綴簇。寸田結初果，秀若銅生綠。

荆棘掃誠盡，梨棗憂不熟。高人寧鑄金，下士乃服玉。
君看嶺嶠隘，我欲巾笥蓄。曾攀羅浮頂，亦到朱明谷。
旋觀真歷塊，歸臥甘破屋。故人老猶仕，世味薄如穀。
偶從越女笑，不怕蠻江浴。驚聞尺書到，喜有新詩辱。
應憐五管客，曾作八州督。骨消讒口鏽，膽破獄吏酷。
壠雲不易寄，江月乃可掬。遙知清遠寺，不稱空洞腹。
蹇驢步武碎，短瑟絃柱促。仰看泉落珮，俯聽石響縠。
千峯瀉清駛，一往無回躅。狂雷失晤語，過電不容目。
要知僧長飢，正坐山少肉。人間無南北，蝸角空出縮。
仇池九十九，仇池有九十九泉。予嘗夢至有詩，嵩山
三十六。子由近賈田陽，霍北望嵩山甚近。天人同一夢，仙凡無兩錄。
陋邦真可老，生理亦粗足。便回爇天焰，長作照海燭。燕天焰見退之詩，近黃魯直寄詩云：蓮花合裏一寸燭，牝馬海中燒百川。
魯直蓋近有得也。

食荔支二首并引

惠州太守東堂祠故相陳文惠公堂下有公手植荔支一株。郡人謂將軍樹。今歲大熟。賞啖之餘。下逮吏卒其高不可致者。縱猿取之。

丞相祠堂下。將軍大樹旁。炎雲駢火實。瑞露酌天漿。爛紫垂先熟。高紅挂遠揚。分甘徧鈴下。也到黑衣郎。
羅浮山下四時春。蘆橘楊梅次第新。日啖荔支三百顆。不妨長作嶺南人。

和子由盆中石菖蒲忽生九花

春荑秋莢兩須臾。神藥人間果有無。無鼻何由識。舊匱有花今始信。菖蒲芳心未飽。兩蝶蝶寒意知。鳴幾
蟪蛄記。取明年十二節。小兒休更簪霜鬚。

遷居

吾紹聖元年十月二日至惠州寓合江樓是月十八日遷於嘉祐寺二年三月十九日復遷於合江樓三年四月二十日復歸於嘉祐寺時方卜築白鶴峯之上新居成庶幾其少安乎

前年家水東回首夕陽麗去年家水西溼面春雨細東西兩無擇緣盡我輒逝今年復東徙舊館聊一憩已買白鶴峯規作終老計長江在北戶雪浪舞吾砌青山滿牆頭鬢髮幾雲髻雖慚抱朴子金鼎陋蟬蛻猶賢柳柳州廟俎薦丹荔吾生本無待俯仰了此世念念自成劫塵塵各有際下觀生物息相吹等蚊蚋

兩橋詩并引

惠州之東江谿合流有橋多廢壞以小舟渡羅浮道士鄧守安始作浮橋以四十舟爲二十舫鐵鎖石甞隨水漲落榜曰東新橋州西豐湖上有長橋屢作屢壞栖禪院僧希固築進兩岸爲飛閣九間盡用石鹽木堅若鐵石榜曰西新橋皆以紹聖三年六月畢工作二詩落之

東新橋

羣鯨貫鐵索背負橫空霓首搖翻雪江尾插崩雲谿機牙任信縮漲落隨高低轆轤卷巨索青蛟挂長堤奔舟免狂觸脫筏防撞擠一橋何足云謙傳廣東西父老有不識喜笑爭攀躋魚龍亦驚逃雷雹生馬蹏嗟此病涉久公私困留稽姦民食此險出沒如鳬鷺似賣失船壺如去登樓梯不知百年來幾人隕沙泥豈知濤瀾上安若堂與闔往來無晨夜醉病休扶攜使君飲我言妙割無牛雞不云二子勞歎我捐腰犀二士造橋予嘗助施犀帶我亦壽使君一言聽扶藜常當修未壞勿使後噬臍

西新橋

昔橋本千柱。挂湖如斷霓。浮梁陷積淖。破板隨奔谿。笑看遠岸沒。坐覺孤城低。聊因三農隙。稍進百步堤。
炎州無堅植。潦水輕推擠。千年誰在者。鐵柱羅浮西。獨有石鹽木。白蟻不敢躋。似開銅駝峯。如鑿鐵馬蹏。
岌岌類鞭石。山川非會稽。嗟我久閣筆。不書紙尾驚蕭然。無尺箋欲構飛空梯。百夫下一杙。椓此百尺泥。
橋柱石礎之下。皆有堅木榦入泥中。丈餘謂之頂椿。探囊賴故侯。寶錢田金闔子。由之婦史項入內。得賜
黃金錢數十助施。父老喜雲集。簾壺無空攜。三日飲不散。殺盡西村雞。似聞百歲前。海近湖有犀。橋下舊
名鷗湖。蓋嘗有鷗鷺之類。那知陵谷變。枯瀆生茭藜。後來忽忘今。冬涉水過臍。

悼朝雲詩并引

紹聖元年十一月戲作朝雲詩。三年七月五日朝雲病亡於惠州。葬之栖禪寺松林中。東南直大聖塔。予
既銘其墓。且和前詩以自解。朝雲始不識字。晚忽學書。粗有楷法。蓋嘗從泗上比丘尼義冲學佛。亦略聞
大義。且死誦金剛經四句偈而絕。

苗而不秀。豈其天。不使童鳥與我玄。駐景恨無千歲藥。贈行唯有小乘禪。傷心一念償前債。彈指三生斷
後緣。歸臥竹根無遠近。夜燈勤禮塔中仙。

卷六

詩六十七首

丙子重九二首

三年瘴海上。越嶠真我家。登山作重九。鬱菊秋未花。唯有黃茆根。堆墳生物蘚。蜒酒蘖衆毒。酸甜如梨楂。

何以侑一樽。隣翁餽蠶蛇。亦復強取醉。歡謠雜悲嗟。今年吁惡歲。僵仆如亂麻。此會我雖健。狂風卷朝霞。窮塗不擇友。過眼如亂雲。餘子誰復數。坐閱兩使君。共飲去年堂。俯看秋水紋。此水與此人。相追兩沄沄。老去各休息。造物嗟長勤。佳哉此令節。不惜與子分。何以娛我客。游魚在清潰。水師三百指。鐵網欲掩羣。獲多雖一快。買放尤可欣。此樂真不朽。明年我歸耘。

白鶴峯新居欲成夜過西鄰翟秀才

林行婆家初閉戶。翟夫子舍尙留關連。娟缺月黃昏後。縹渺新居紫翠間。繫悶豈無羅帶水。韓退之云：水作青羅帶。山爲碧玉簪。割愁還有劍鋩山。柳子厚云：海上尖峯若劍鋩。秋來處處割愁腸。皆嶺南詩也。中原北望無歸日。鄰火村春自往還。

次韻子由所居六詠

堂前種山丹。錯落馬腦盤。堂後種秋菊。碎金收辟寒。草木如有情。慰此芳歲闌。幽人正獨樂。不知行路難。
詩人故多感。花發憶兩京。石榴有正色。玉樹真虛名。粲粲秋菊花。卓爲霜中英。萸槧照重九。纈藥兩鮮明。
幽居有古意義。井分西牆誰言三伏熱。上須一盃涼。先生坐忍渴。羣囂自披猖。衆散徐酌飲。逡巡味尤長。
先生飯土墻。無物與劉叉。何以娛醉客。時鱗砌下花。井水分西鄰。竹陰借東家。蕭然行腳僧。一身寄天涯。

東齋手種柏，今復幾尺長。知有桓司馬，榛茆爲遮藏。近聞南臺松，新枝出餘僵。年來此懷抱，豈復驚凡亡。

新居已覆瓦，無復風雨憂。檣栽與籠竹，小詩亦可求。尙欲煩貳師，刻山出飛流。應須鑿百尺，兩綆載一牛。

吳子野絕粒不睡過作詩戲之芝上人陸道士皆和予亦次其韻

聊爲不死五通仙，終了無生一大緣。獨鶴有聲知半夜，老蠶不食已三眠。憐君解比人間夢，芝有夢齊子。

由作銘許我時逃醉後禪會與江山成故事不妨詩酒樂新年

次韻惠循二守相會
共惜相從一寸陰，酒盃雖淺意殊深。且同月下三人影，莫作天涯萬里心。東嶺近開松菊徑，南堂初絕斧斤音。知君善頌如張老，猶望攜壺更一臨。

又次韻二守同訪新居二首

數畝蓬蒿古縣陰，曉窗清快夜堂深。也知卜築非真宅，聊欲跏趺看此心。聞道攜壺問奇字，更因登木助微音。相娛北戶江千頃，直下都無地可臨。
此生真欲老牆陰，却掃都忘歲月深。拔薤已觀賢守政，折蔬聊慰故人心。風流賀監常吳語，憔悴鍾儀獨楚音。治狀兩邦俱第一，潁川歸去肯重臨。

循守臨行出小鬟復用前韻

學語雛鶯在柳陰，臨行呼出翠帷深。通家不隔同年面，二守同年家得路。方知異日心，趁著春衫游上苑。要求國手教新音，嶺梅不用催歸騎。截鐙須防舊所臨，循守近爲韶伴。

種茶

松間旅生茶已與松俱瘦。茨棘尙未容。蒙翳爭交構。天公所遺棄。百歲仍穉幼。紫笋雖不長。孤根乃獨壽。移栽白鶴嶺。土軟春雨後。彌旬得連陰。似許晚遂茂。能忘流轉苦。戢戢出鳥喙。未仕供白磨。且作資摘嗅。千園輸太官。百餅銜私鬪。何如此一啜。有味出吾圃。

白鶴山新居鑿井四十尺遇盤石石盡乃得泉

海國困蒸溽。新居利高寒。以彼陟降勞易此寢處乾。但苦江路峻。常慚汲腰酸。矻矻煩四夫。礲礲斲層巒。彌旬得尋丈。下有青石盤。終日但迸火。何時見飛瀾。豐我粲與醪。利汝椎與鑽。山石有時盡。我意殊未闡。今朝僮僕喜。黃土復可搏。晨鉗得雪乳。莫礧渟冰湍。我生類如此。何適不艱難。一勺亦天賜。曲肱有餘歡。

三月二十九日二首

南嶺過雲開紫翠。北江飛雨送淒涼。酒醒夢回春盡日。閉門隱几坐燒香。
門外橘花猶的爛。牆頭荔子已爛斑。樹暗草深人靜處。卷簾欹枕臥看山。

吾謫海南子由雷州被命卽行了不相知至梧乃聞其尙在藤也旦夕當追及作此詩示之

九疑聯縣屬衡湘。蒼梧獨在天一方。孤城吹角煙樹裏。落月未落江蒼茫。幽人拊枕坐歎息。我行忽至舜所藏。江邊父老能說子。白須紅頰如君長。莫嫌瓊雷隔雲海。聖恩尙許遙相望。平生學道真實意。豈與窮達俱存亡。天其以我爲箕子。要使此意留要荒。他年誰作輿地志。海南萬古真吾鄉。

行瓊儋間肩輿坐睡夢中得句云千山動鱗甲萬谷酣笙鐘覺而遇清風急雨戲作此數句

四州環一島，百洞蟠其中。我行西北隅，如度月半弓。登高望中原，但見積水空。此生當安歸，四顧真途窮。眇觀大瀛海，坐詠談天翁。茫茫太倉中，一米誰雌雄。幽懷忽破散，永嘯來天風。千山動鱗甲，萬谷酣笙鐘。安知非羣仙，鈞天宴未終。喜我歸有期，舉酒屬青童。急雨豈無意，催詩走羣龍。夢雲忽變色，笑雷亦改容。應怪東坡老，顏衰語徒工。久矣此妙聲，不聞蓬萊宮。

次前韻寄子由

我少卽多難，遭回一生中。百年不易滿，寸寸彎強弓。老矣復何言，榮辱今兩空。泥丸尙一路，古語云十方。薄伽梵一路，涅槃門所向。餘皆窮似聞，崆峒西仇池。迎此翁，胡爲適南海。復駕垂天雄，下視九萬里。浩浩皆積風，回望古合州。屬此琉璃鍾，離別何足道。我生豈有終，渡海十年歸。方鏡照兩童，還鄉亦何有。暫假壺公龍，峨眉向我笑。錦水爲君容，天人巧相勝。不獨數子工，指點昔游處。蒿萊生故宮。

安期生并引

安期生，世知其爲仙者也。然太史公曰：「蒯通善齊人安期生。」生嘗以策干項羽，羽不能用。羽欲封此兩人，兩人終不肯受。亡去，予每讀此，未嘗不廢書而歎。嗟乎！仙者非斯人而誰爲之？故意戰國之士如魯連、虞卿，皆得道者歟。

安期本策士，平日交蒯通。嘗干重瞳子，不見隆準公。應如魯仲連，抵掌吐長虹。難堪踞牀洗，寧挹扛鼎雄。事旣兩大繆，飄然籬遺風。乃知經世士，出世或乘龍。豈比山澤臞，忍飢啖柏松。縱使偶不死，正堪爲僕僮。茂陵秋風客，望祖猶蟻蠡。侮上如瓜棗，可聞不可逢。

夜夢井引

七月十三日至儋州十餘日矣。澹然無一事。學道未至。靜極生愁。夜夢如此。不免以書自怡。
夜夢嬉游童子如父師。檢責驚走書。計功當畢春秋餘。今乃始及桓莊初。怛然慄寤心不舒。起坐有如挂
鉤魚。我生紛紛嬰百緣。氣固多習獨此偏。弃書事君四十年。仕不顧留書繞纏。自視汝與丘孰賢。易韋三
絕丘。猶然如我。當以犀革編。

遷居之夕聞鄰舍兒誦書欣然而作

幽居亂蛙鼴。生理半人禽。茫然已可喜。況聞弦誦音。兒聲自圓美。誰家兩青衿。且欣習齊咻。未敢笑越吟。
九齡起韶石。姜子家日南。吾道無南北。安知不生今。海闊尚挂斗。天高欲橫參。荆榛短牆缺。燈火破屋深。
引書與相和。置酒仍獨斟。可以侑我醉。琅然如玉琴。

聞子由瘦僧行耳至難得肉食

五日一見花猪肉。十日一遇黃雞粥。土人頓頓食諸芋。薦以熏鼠燒蝙蝠。舊聞蜜唧嘗嘔吐。稍近蝦蟆緣。
習俗十年京國厭肥羗。日日蒸花壓紅玉。從來此腹負將軍。今者固宜安脫粟。俗諺云大將軍食飽捫腹
而歎曰我不負汝。左右曰將軍固不負此腹。此腹負將軍。未嘗出少智慮也。人言天下無正味。卽且未遽
賢麋鹿。海康別駕復何爲。帽寬帶落驚僮僕。相看會作兩臘仙。還鄉定可騎黃鵠。

客俎經旬無肉。又子由勸不讀書。蕭然清坐。乃無一事。
病怯鯷鹹。不買魚爾來。心腹一時虛。使君不復憐烏攫。屬國方將掘鼠餘。老去獨收人所弃。游哉時到物

之初從今免被孫郎笑絳帕蒙頭讀道書

宥老楮

我牆東北隅張王維老穀樹先樗櫟大葉等桑柘沃流膏馬乳漲墮子楊梅熟胡爲尋丈地養此不材木蹶之得輿薪規以種松菊靖言求其用略數得五六膚爲蔡侯紙子入桐君錄黃縉練成素黝面頰作玉灌灑蒸生菌腐餘光吐燭雖無傲霜節幸免狂醒毒孤根信微陋生理有倚伏投斧爲賦詩德怨聊相贖

觀棋并引

予素不解棋嘗獨游廬山白鶴觀觀中人皆閨戶晝寢獨聞棋聲於古松流水之間意欣然喜之自爾欲學然終不解也兒子過乃粗能者僕守張中日從之戲予亦隅坐竟日不以爲厭也

五老峯前白鶴遺趾長松蔭庭風日清美我時獨游不逢一士誰歟棋者戶外屢二不聞人聲時聞落子紋枰坐對誰究此味空鉤意釣豈在鮋鯉小兒近道剝啄信指勝固欣然敗亦可喜優哉游哉聊復爾耳

糴米

糴米買束薪百物資之市不緣耕樵得飽食殊少味再拜請邦君願受一塵地知非笑昨夢食力免內愧
春秧幾時花夏稗忽已穟悵焉撫未耜誰復識此意

入寺

曳杖入寺門輯杖挹世尊我是玉堂仙謫來海南村多生宿業盡一氣中夜存旦隨老鴉起飢食扶桑暾光圓蹙尼珠照耀玻璃盆來從佛印可稍覺魔忙奔閑看樹轉午坐到鐘鳴昏斂收平生心耿耿聊自溫

次韻子由三首

東亭

仙山佛國本同歸。世路玄關兩背馳。到處不妨閑卜築。流年自可數期頤。遙知小檻臨塵市。定有新松長棘茨。誰道茆簷劣容膝。海天風雨看紛披。

東樓

白髮蒼顏自照盆。董生端合是前身。獨栖高閣多辭客。爲箸新書未絕鱗。小醉易醒風力軟。安眠無夢雨聲新。長歌自謂真堪笑。底處人間是所欣。柳子厚詩云。長歌返故室。自謂非所欣。

椰子冠

天教日飲欲全絲。美酒生林不待儀。自漉疎巾邀醉客。更將空殼付冠師。前漢高紀注云薛有作冠師規摹簡古人爭看簪導輕安髮不知更著短簷高屋帽東坡何事不違時

次韻子由月季花再生

幽芳本長春。暫瘁如蝕月。且當付造物。未易料枯桺。也知宿根深。便作紫筍苗。乘時出婉婉。爲我暖栗冽。先生蚤貴重廟論。推英拔而今城東瓜。不記召南茭陋居。有遠寄小圃無闢蹠。還爲久處計。坐待行年匝。子由明年六十。臘果綴梅枝。春盈浮竹葉。誰言一萌動。已覺萬木活。聊將玉葉新。世謂此玫瑰花插向綸

巾折。

次韻子由洛罷

理髮千梳淨，風晞勝湯沐。閉息萬竅通，霧散名乾浴。
頽然語默喪，靜見天地復。時令具薪水，漫欲灌腰腹。
陶匠不可求，益斛何由足。海南無浴器，故常乾浴而已。
老雞臥糞土，振羽雙暝目。倦馬驟風沙，奮鬣一噴玉。
垢淨各殊性，快愜聊自沃。雲母透蜀紗，琉璃瑩簾竹。
稍能夢中覺，漸使生處熟。楞嚴在牀頭，妙偈時仰讀。
返流歸照性，獨立遺所矚。未知仰山禪，已就季主卜。
安心會自得，助長毋相督。

借前韻賀子由生第四孫斗老

今日散幽憂，彈冠及新沐。況聞萬里孫，已報三日浴。
朋來四男子，大壯泰臨復。開書喜見面，未飲春生腹。
無官一身輕，有子萬事足。舉家傳吉夢，殊相驚。
凡目爛爛，開眼電磂磂。峙頭玉，李賀詩云：頭玉磂，磂眉刷翠。杜郎生得真男子，但令強筋骨。
可以耕沃野，不須富文章。端解耗紙竹，君歸定何日。
我計久已熟，長留五車書。
要使九子讀，吾與子由共九孫男矣。
筆瓢有內樂，軒冕無流羈。人言适似我，窮達已可卜。
蚤謀二頃田，莫待八州督。
吾前後典八州。

獨覺

瘴霧三年恬不怪，反畏北風生體疥。
朝來縮頸似寒鴉，焰火生薪聊一快。
紅波翻屋春風起，先生默坐春風裏。
浮空眼纈散雲霞，無數心花發桃李。
翛然獨覺午窗明，欲覺猶聞醉鼾聲。
回首向來蕭瑟處，也無風雨也無晴。

十二月十七日夜坐達曉寄子由

燈燼不挑垂暗檠，爐香重撥上餘薰。
清風欲發鴉翻樹，缺月初升犬吠雲。
閉眼此心新活計，隨身孤影舊

知聞雷州別乘應危坐跨海幽光與子分。

謫居三適三首

旦起理髮

安眠海自運浩浩潮黃宮日出露未晞鬱鬱濛霜松老櫛從我久齒疎含清風一洗耳目明習習萬竅通少年苦嗜睡朝謁常忽忽爬搔未云足已困冠巾重何異服轍馬沙塵滿風驥玳鞍響珂月實與杻械同解放不可期枯柳豈易逢誰能書此樂獻與腰金公

午窗坐睡

蒲團盤兩膝竹几閣雙肘此間道路熟徑到無何有身心兩不見息息安且久睡蛇本亦無何用鉤與手神凝凝夜禪體適劇卯酒我生有定數祿盡空餘壽枯楊下飛花膏澤回衰朽謂我此爲覺物至了不受謂我今方夢此心初不垢非夢亦非覺請問希夷叟

夜臥濯足

長安大雪年束薪抱衾裯雲安市無井斗水寬百憂今我逃空谷孤城嘯鵠鵠得米如得珠食菜不敢留況有松風聲釜鑊鳴颶颶瓦盃深及膝時復冷暖投明燈一爪翦快若鷹辭韁天低瘴雲重地薄海氣浮土無重臚藥獨以薪水瘳誰能更包裹冠履裝沐猴

子由生日

上天不難知好惡與我一方其未定間人力破陰隲少忍待其定報應真可必季氏生而仁觀過見其實

端如柳下惠，焉往不三黜。天有時而定，壽考未易畢。兒孫七男子，三子四孫次第皆。逢吉遙知設羅門，獨掩懸磬室。回思十年事，無愧箇中筆。但願白髮兄，年年作生日。

以黃子木拄杖爲子由生日之壽

靈壽扶孔光，菊潭飲伯始。雖云閑草木，豈樂蒙此恥。一時偶收用，千載相瘢痕。海南無佳植，野果名黃子。堅瘦多節目，天材任操倚。嗟我始剪裁，世用或緣此。貴從老夫手，往配先生几。相從歸故山，不愧仙人杞。本草梅杞 一名仙人杖。

過於海舶得邁寄書酒作詩遠和之皆粲然可觀子由有書相慶也因用其韻賦一篇并寄諸子姪

我似老牛鞭不動，雨滑泥深四蹄重。汝如黃犢走卻來，海闊山高百程送。庶幾門戶有八慈，不恨居鄰無二仲。他年汝曹笏滿牀，中夜起舞踏破甕。會當洗眼看騰躍，莫指癡腹笑空洞。譽兒雖是兩翁癖，積德已自三世種。豈惟萬一許生還，尙恐九十煩珍從。六子晨耕簞瓢出，衆婦夜績燈火共。春秋古史乃家法，詩筆離騷亦時用。但令文字還照世，糞土腐餘安足夢。

上元夜過赴儋守召獨坐有感戊寅歲

使君置酒莫相違，守舍何妨獨掩扉。靜看月窗盤蝎蜥，臥聞風幔落蠛𧇵。燈花結盡吾猶夢，香篆消時汝欲歸。搔首淒涼十年事，傳柑歸遺滿朝衣。

海南人不作寒食而以上巳上冢予攜一瓢酒尋諸生皆出矣獨老符秀才在因與飲至醉符蓋

僧行人之安貧守靜者也

老鴉銜肉紙飛灰。萬里家山安在哉。蒼耳林中太白過。鹿門山下德公回。管寧投老終歸去。王式當年本不來。記取城南上已日。木縣花落刺桐開。

新居

朝陽入北林。竹樹散疎影。短籬尋丈間。寄我無窮境。舊居無一席。逐客猶遭屏。結茅得茲地。翳翳村巷永。數朝風雨涼。畦菊發新穎。俯仰可卒歲。何必謀二頃。

五色雀

海南有五色雀。常以兩絳者爲長。進止必隨焉。俗謂之鳳皇云。久旱而見。輒雨潦。則反是吾卜居儋耳城南。嘗一至庭下。今日又見之。進士黎子雲及其弟威家。旣去。吾舉酒祝之曰。若爲吾來者。當再集也。已而果然。乃爲賦詩。

粲粲五色羽。炎方鳳之徒。青黃縞玄服。翼衛兩紱朱。仁心知閔農。常告雨霽符。我窮惟四壁。破屋無瞻烏。惠然此粲者。來集竹與梧。鏘鳴如玉佩。意欲相嬉娛。寂寞兩黎生。食菜直臞儒。小圃散春物。野桃陳雪膚。舉盃得一笑。見此紅鸞雛。高情如飛仙。未易握粟呼。胡爲去復來。眷眷豈屬吾。回翔天壤間。何必懷此都。

倦夜

倦枕厭長夜。小窗終未明。孤村一犬吠。殘月幾人行。衰鬢久已白。旅懷空自清。荒園有絡緯。虛織竟何成。

用過韻冬至與諸生飲酒

小酒生黎法乾糟凡益中芳辛知有毒滴瀝取無窮凍醴寒初滋春醅暖更饌華夷兩樽合醉笑一歡同里閈峨山北田園震澤東歸期那敢說安訊不曾通鶴鬢驚全白犀圍尙半紅愁顏解符老壽耳鬪吳翁得穀鵝初飽亡貓鼠益豐黃糞收土芋蒼耳研霜叢兒瘦緣儲藥奴肥爲種松頻頻非竊食數數尙乘風河伯方夸若靈媧自舞馮歸途陷泥淖炬火燎茅蓬膝上王文度家傳張長公和詩仍醉墨戲海亂羣鴻符吳皆坐客其餘皆卽事實錄也。

縱筆三首

寂寂東坡一病翁白須蕭散滿霜風小兒誤喜朱顏在一笑那知是酒紅父老爭看烏角巾應緣曾現宰官身谿邊古路三叉口獨立斜陽數過人北船不到米如珠醉飽蕭條半月無明日東家知祀竈隻雞斗酒定皤吾

貧家淨掃地

貧家淨掃地貧女好梳頭下士晚聞道聊以拙自修扣門有佳客一飯相邀留春炊勿草草此客未易媿慎勿用勞薪感我如薰蕕德人抱衡石銖委安可庾

次韻子由贈吳子野先生二絕句

馬迹車輪滿四方若爲閉著小茆堂仙心欲捉左元放癡疾還同顧長康江令蒼苔圍故宅謝家語薰集華堂先生笑說江南事祇有青山繞建康被酒獨行徧至子雲威徽先覺四黎之舍三首

半醒半醉問諸黎。竹刺藤稍步步迷。但尋牛矢覓歸路。家在牛欄西復西。
總角黎家三小童。口吹葱葉送迎翁。莫作天涯萬里意。谿邊自有舞雩風。
符老風情柰老何。朱顏減盡鬢絲多。投梭每困東鄰女。換扇唯逢春夢婆。是日復見符林秀才說換扇之事。

夜燒松明火

歲莫風雨交。客舍淒薄寒。夜燒松明火。照室紅龍鸞。快焰初煌煌。碧煙稍團團。幽人忽富貴。總帳芬椒蘭。珠煤綴屋稍。香瀟音諳。松瀝也。出本草注。流銅槃。坐看十八公。俯仰灰燼殘。齊奴朝爨蠟。萊公夜長歎。海康無此物。燭盡更未闌。

庚辰歲人日作時聞黃河已復北流老臣舊數論此今斯言乃驗

老去仍栖隔海村。夢中時見作詩孫。天涯已慣逢人日。歸路猶欣過鬼門。三策已應思賈讓。孤忠終未赦。虞翻典衣剩買河源米。屈指新築作上元。

不用長愁挂月村。檳榔生子竹生孫。海南勒竹每節生枝。如竹竿大。蓋竹孫也。新巢語燕還窺硯。舊雨來人不到門。春水蘆根看鶴立。夕陽楓葉見鴉翻。此生念念隨泡影。莫認家山作本元。
蓋酒名也。菜圃漸疎花漠漠。竹扉斜掩雨紛紛。擁裘睡覺知何處。吹面東風散纈紋。

庚辰歲正月十二日天門冬酒熟予自漉之且嘗遂以大醉二首

自撥牀頭一甕雲。幽人先已醉濃芬。天門冬熟新年喜。淘米春香並舍聞。杜子美詩云。聞道雲安淘米春。

載酒無人過子雲。年來家醞有奇芬。醉鄉杳杳誰同夢。睡息齁齁得自聞。口業向詩猶小小。眼花因酒尙紛紛。點餚更試淮南語。汎溢東風有縠紋。淮南子云。東風至而酒汎溢。許慎注云。酒汎清酒也。

追和戊寅歲上元

春鴻社鷺巧相違。白鶴峯頭白板扉。石建方欣洗牕廁。姜龐不解歎蠭蟬。一龜京口嗟春夢。萬炬錢塘憶夜歸。合浦賣珠無復有。當年笑我泣牛衣。

題過所畫枯木竹石

老可能爲竹寫真。小坡今與石傳神。山僧自覺菩提長。心境都將付臥輪。
散木支離得自全。交柯蚴螺欲相纏。不須更說能鳴鴈。要以空中得盡年。
倦看澁勒暗蠻村。亂棘孤藤束瘴根。唯有長身六君子。依依猶得似淇園。

真一酒歌并引

布算以步五星。不如仰觀之捷。次律以求中聲。不如耳齊之審。鉛汞以爲藥策。易以候火。不如天造之真。也是故神宅空樂出虛蹊踰者。以氣升。孰能推是類以求天造之藥乎。於此有物。其名曰真一。遠游先生方治此道。不飲不食。而飲此酒。食此藥。居此堂。予亦竊其一二。故作真一之歌。其詞曰。

空中細莖插天芒。不生沮澤生陵岡。涉閱四氣更六陽。森然不受螟與蝗。飛龍御月作秋涼。蒼波改色屯雲黃。天旋雷動玉塵香。起搜十裂照坐光。踟趺半喫安且詳。動搖天關出瓊漿。壬公飛空丁女藏。三伏遇井了不嘗釀爲真一。和而莊。三杯儼如侍君王。湛然寂照非楚狂。終身不入無功鄉。

卷七

詩八十九首

汲江煎茶

活水還須活火烹。唐人云。茶須緩火炙。活火煎。自臨釣石取深清。大瓢貯月歸春甕。小杓分江入夜餅。茶雨已翻煎處腳。松風忽作瀉時聲。枯腸未易禁三盃。坐數荒村長短更。

予來儋耳得吠狗曰烏觜甚猛而馴隨予遷合浦過澄邁汎而濟路人皆驚戲爲作此詩

烏喙本海獒。幸我爲之主。食餘已瓠肥。終不憂鼎俎。晝馴識賓客。夜捍爲門戶。知我當北還。掉尾喜欲舞。跳踉趁僮僕。吐舌喘汗雨。長橋不肯躡。徑度清深浦。拍浮似鵝鴨。登岸劇虓虎。盜肉亦小疵。鞭箠當貫汝。再拜謝恩厚。天不遺言語。何當寄家書。黃耳定乃祖。

澄邁驛通潮閣二首

倦客愁聞歸路遙。眼明飛閣俯長橋。貪看白鷺橫秋浦。不覺青林沒晚潮。餘生欲老海南村。帝遣巫陽招我魂。杳杳天低鶴沒處。青山一髮是中原。

河酌亭詩并引

瓊山郡東衆泉觱發。然皆冽而不食。丁丑歲六月。軾南遷過瓊。始得雙泉之甘於城之東北隅。以告其人。自是汲者常滿。泉相去咫尺而異味。庚辰歲六月十七日。遷于合浦。復過之。太守承議郎陸公求泉上之。

亭名與詩名之曰洞酌，其詩曰。
洞酌彼兩泉，挹彼注茲。一斟之中，有澑有淄。以淪以烹，衆喊莫齊。自江徂海，浩然無私。豈弟君子，江海是儀。旣味我泉，亦贗我詩。

六月二十日夜渡海

參橫斗轉欲三更，苦雨終風也解晴。雲散月明誰點綴，天容海色本澄清。空餘魯叟乘桴意，粗識軒轅奏樂聲。九死南荒吾不恨，茲游奇絕冠平生。

自雷適廉宿於興廉村淨行院

荒涼海南北，佛舍如鶴棲。忽此榕林中，跨空飛柂枅。當門列碧井，洗我兩足泥。高堂磨新輒，洞戶分角圭。倒牀便甘寢，鼻息如虹霓。僮僕不肯去，我爲半日稽。晨登一葉舟，醉兀十里谿。醒來知何處，歸路老更迷。

廉州龍眼質味殊絕可敵荔支

龍眼與荔支，異出同父祖。端如柑與橘，未易相可否。異哉西海濱，琪樹羅玄圃。纍纍似桃李，一一流膏乳。坐疑星隕空，又恐珠還浦。圖經未嘗說，玉食遠莫數。獨使皴皮生，弄色映珊瑚。荒非汝辱幸，免妃子汙。

其韻

孤雲出岫豈求伴，錫杖凌空自要飛。爲問庭松尙西指，不知老裝幾年歸。

梅聖俞之客歐陽晦夫使工畫茅庵已居其中一琴橫牀而已曹子方作詩四韻僕和之云

寂寞王子猷。回船剡溪路。超遙戴安道。雪夕誰與度。倒披王恭氅。半掩袁安戶。應調折絃琴。自和撚須句。

歐陽晦夫惠琴枕

中郎不眠仰看屋。得此古椽圍尺竹。輪囷濩落非笛材。剖作袖琴徽軫足。流傳幾處到淵明。臥枕綸巾酒。新漉孤鸞別鵠誰復聞。鼻息齁齁自成曲。

留別廉守

編蘆以荳。猪塉塗以塗之。小餅如嚼月。中有酥與飴。懸知合浦人。長誦東坡詩。好在真一洒。爲我醉宗資。餅笙詩并引

庚辰八月二十八日劉幾仲餞飲東坡中觴聞笙簫聲杳杳若在雲霄間抑揚往返粗中音節徐而察之則出於雙餅水火相得自然吟嘯蓋食頃乃已坐客驚歎得未曾有請作餅笙詩記之

孤松吟風細泠泠獨竚長繅女媧笙陋哉石鼎逢彌明丘岫竅作蒼蠅聲餅中宮商自相賡昭文無虧亦無成東坡醉熟呼不醒但云作勞吾耳鳴

歐陽晦夫遺接羅琴枕戲作此詩謝之

攜兒過嶺今七年晚塗更著黎衣冠白頭穿林要藤帽赤腳渡水須花縵不愁故人驚絕倒但使俚俗相恬安見君合浦如夢寐挽須握手俱汎瀾妻縫接羅霧縠細兒送琴枕冰微寒無絃且寄陶令意倒載猶作山公看我懷汝陰六一老眉宇秀發如春巒羽衣鶴氅古仙伯岌岌兩柱扶霜纨至今畫像作此服凜如退之加渥丹爾來前輩皆鬼錄我亦帶脫巾欹寬作詩頗似六一語往往亦帶梅翁酸

次韻王鬱林

晚塗流落不堪言。海上春泥手自翻。漢使節空餘皓首故侯瓜在有頽垣。平生多難非天意。此去殘年盡主恩。誤辱使君相收拭。寧聞老鶴更乘軒。

藤州江上夜起對月贈邵道士

江月照我心。江水洗我肝。端如徑寸珠。墮此白玉盤。我心本如此。月滿江不湍。起舞者誰歟。莫作三人看。嶠南瘴毒地。有此江月寒。乃知天壤間。何人不清安。牀頭有白酒。盞若白露溥。獨醉還獨醒。夜氣清漫漫。仍呼邵道士。取琴月下彈。相將乘一葉。夜下蒼梧灘。

徐元用使君與其子端常邀僕與小兒過同游東山浮金堂戲作此詩

昔與徐使君。共賞錢塘春。愛此小天竺。時來中聖人。松如遷客老。酒似使君醇。繫舟藤城下。弄月鐸江濱。江月夜夜好。雲山朝朝新。使君有令子。真是石麒麟。我子乃散材。有如木輪囷。二老白接蘿。兩郎烏角巾。醉臥松下石。扶歸江上津。浮橋半沒水。揭此碧鱗鱗。

送鮮于都曹歸蜀灌口舊居

簷盡霜須照碧銅。依然春雪在長松。朝行犀浦催收芋。夜渡繩橋看伏龍。莫歎倦游無駟馬。要將老健敵千鍾。子雲三世惟身在。爲向西南說病容。

送邵道士彥肅還都嶠

乞得紛紛擾擾身。結茆都嶠與仙鄰。少而寡慾顏常好。老不求名語益真。許邁有妻還學道。陶潛無酒亦

從人相隨十日還歸去萬劫清遊結此因。

書韓幹二馬

赤鬚碧眼老鮮卑。回策如縛獨善騎。赭白紫騮俱絕世。馬中岳湛有妍姿。

將至廣州用過韻寄邁迨二子

皇天遺出家。臨老乃學道。北歸爲兒子。破戒堪一笑。披雲見天眼。回首失海潦。蠻唱與黎歌。餘音猶杳杳。大兒牧衆穉。四歲守孤嶠。次子病學醫。三折乃粗曉。小兒耕且養。得暇爲書繞。我亦困詩酒。去道愈茫渺。紛紛何時定。所至皆可老。莫學柳儀曹。詩書教氓掠。亦莫事登陟。谿山有何好。安居在我游。閉戶淨洒掃。

贈鄭清叟秀才

風濤戰扶胥。海賊橫泥子。胡爲犯二怖。博此一笑喜。問君奚所欲。欲談仁義耳。我才不逮人。所有聊足已。安能相付予。過聽君誤矣。霜風掃瘴毒。冬日稍清美。年來萬事足。所欠惟一死。澹然兩無求。滑淨空棐几。和孫叔靜兄弟李端叔唱和

病骨瘦欲折。霜鬚箇更疎。喜聞新國政。兼得故人書。秉燭真如夢。傾盃不敢餘。天涯老兄弟。懷抱幾時據。廣倅蕭大夫借前韻見贈復和答之

坐還粗勝虞。早退不如疎。垂死初聞道。平生誤信書。風濤驚夜半。疾病送災餘。賴有蕭夫子。幽懷得少據。心閑詩自放。筆老語驪疎。贈我皆強韻。知君得異書。滔滔沮叟是綽綽孟生餘。一笑滄溟側。應無憤可據。

徐熙杏花

江左風流王謝家。盡攜書畫到天涯。却因梅雨丹青暗。洗出徐熙落墨花。

趙昌四季

芍藥

倚竹佳人翠袖長。天寒猶著薄羅裳。揚州近日紅千葉。自是風流時世粧。

躡躅

楓林翠壁楚江邊。躡躅千層不忍看。開卷便知歸路近。劍南樵叟爲施丹。

寒菊

輕肌弱骨散幽葩。真是青裙兩髻丫。便有佳名配黃菊。應緣霜後苦無花。

山茶

遊蜂掠盡粉絲黃。落葉猶收蜜露香。待得春風幾枝在。年來殺菽有飛霜。

和黃秀才鑒空閣

明月本自明。無心孰爲境。挂空如水鑒。寫此山河影。我觀大瀛海。巨浸與天永。九州居其間。無異蛇盤鏡。空水兩無質。相照但耿耿。妄云桂兔蟆。俗說皆可屏。我游鑒空閣。缺月正淒冷。黃子寒無衣。對月句愈警。借君方諸淚。一沐管城穎。誰言小叢林。清絕冠五嶺。

韋偃牧馬圖

神工妙技帝所收。江都曹韓逝莫留。人間畫馬唯韋侯。當年爲誰掃驛駘。至今霜跋踏長楸。圉人困臥涉壠頭。沙苑茫茫蒺藜秋。風髮霧鬢寒颼颼。龍種尙與駕駘游。長稽短豆豈我羞。八鑾六轡非馬謀。古來西山與東丘。

題靈峯寺壁

靈峯山上寶陀寺。白髮東坡又到來。前世德雲今我是。依希猶記妙高臺。

衆妙堂

漠然無觀古真人。我獨觀此衆妙門。夫物芸芸各歸根。衆中得一道乃存。道人晨起開東軒。趺坐一醉扶桑暾。餘光照我玻瓈盆。倒射窗几清而溫。欲收月魄餐日魂。我自日月誰使吞。

題馮通直明月湖詩後

老衍清篇墨未枯。小馮新作語尤姝。呼兒淨洗涵星硯。爲子賡歌墮月湖。聞道牂江空抱珥。年來合浦自還珠。請君多釀蓮花酒。準擬王喬下履鳧。南詔有西洱河。卽古牂柯江也。河形如月耳珥。故名之西洱云。

次韻鄭介夫二首

一落泥塗迹愈深。尺薪如桂米如金。長庚到曉空陪月。太歲今年合守心。相與齶毗持漢節。何妨振履出商音。孤雲倦鳥空來往。自要閑飛不作霖。一生憂患萃殘年。心似驚蠶未易眠。海上偶來期汗漫。葦間猶得見寅緣。良醫自要經三折。老將何妨敗兩甄。收取桑榆種梨棗。祝君眉壽似增川。

昔在九江與蘇伯固唱和其略曰我夢扁舟浮震澤雪浪橫江千頃白覺來滿眼是廬山倚天無數開青壁蓋實夢也昨日又夢伯固手持乳香嬰兒示予覺而思之蓋南華賜物也豈復與伯固相見於此耶今得來書已在南華相待數日矣感歎不已故先寄此詩

扁舟震澤定何時滿眼廬山覺又非春草池塘惠連夢上林鴻臚子卿歸水香知是曹谿口眼淨同看古佛衣不向南華結香火此生何處是真依

次韻韶守狄大夫見贈二首

華髮蕭蕭老遂良。褚河南帖云。卽日遂良須髮盡白。蓋謫長沙時也。一身萍挂海中央。無錢種菜爲家業。有病安心是藥方。才疎正類孔文舉。凝絕還同顧長康。萬里歸來空泣血。七年供奉殿西廊。趙英閣在延和殿西廊下。

森森畫戟擁朱輪。坐詠梁公覺有神。白傅閒游空誦句。事見樂天吳郡詩石絞。拾遺窮老敢論親。事見子美贈狄明府詩。東海莫懷疎受意。西風幸免庾公塵。爲公過嶺傳新唱。催發寒梅一信春。

次韻韶倅李通直二首

一篇瀧吏可書紳。莫向長沮更問津。老去常憂伴新鬼。歸來且喜是陳人。曾陪令尹蒼鬢古。又見郎君白髮新。回首天涯一惆悵。却登梅嶺望楓宸。

青山祇在古城隅。萬里歸來卜築初。會見四山朝鶴鶴。更看二李控鯨魚。欲從抱朴傳家學。應怪中郎得異書。待我丹成馭風去。借君瓊佩與霞裙。僕昔爲開封幕。先公爲赤令。暇日相與論內外丹。且出其丹示

僕今三十年而見君曲江同遊南華宿山水間數日道舊感歎且勸我卜居于舒故詩中皆及之。

狄韶州煮蔓菁蘆菔羹

我昔在田間寒庖有珍烹常支折腳鼎自煮花蔓菁中年失此味想像如隔生誰知南嶽老解作東坡羹中有蘆菔根尙含曉露清勿語貴公子從渠醉羶腥

李伯時畫其弟亮功舊宅圖

樂天蚤退今安有摩詰長閑古亦無五畝自栽池上竹十年空看輞川圖近聞陶令開三徑應許揚雄寄一區晚歲與君同活計如雲鵝鴨散平湖

贈龍光長老

斫得龍光竹兩竿持歸嶺北萬人看竹中一滴曹溪水漲起西江十八灘

贈嶺上老人

鶴骨霜髯心已灰青松合抱手親栽問翁大庾嶺頭住曾見南遷幾箇回

贈嶺上梅

梅花開盡雜花開過盡行人君不來不趁青梅嘗煮酒要看細雨熟黃梅

予昔過嶺而南題詩龍泉鐘上今復過而北次其韻

秋風卷黃落朝雨洗綠淨人貪歸路好節近中原正下嶺獨徐行艱險未敢忘遙知叔孫子已致魯諸生

過嶺二首

暫著南冠不到頭，却隨北鴈與歸休。
平生不作兔三窟，今古何殊貉一丘。
當日無人送臨賀，至今有廟祀潮州劍關。

西望七千里，乘興真爲玉局游。
七年來往我何堪，又試曹谿一勺甘。
夢裏似曾遷海外，醉中不覺到江南。
波生濯足鳴空澗，霧繞征衣滴翠嵐。
誰遣山雞忽驚起，半巖花雨落毵毵。

留題顯聖寺

渺渺疎林集晚鴉，孤村烟火梵王家。
幽人自種千頭橘，遠客來尋百結花。
浮石已乾霜後水，焦坑閑試雨前茶。
祇疑歸夢西南去，翠竹江村綠白沙。

予初調嶺南過田氏水閣東南一峯豐下銳上俚人謂雞籠山予更名獨秀峯今復過之戲留一絕

倚天巉絕玉浮屠，肯與彭郎作小姑。
獨秀江南知有意，要三二別四方壺。

乞數珠一首贈南禪湜老

從君覓數珠，老境仗消遣。
未敢轉千佛，且從千佛轉。
儒生推變化，乾策數大衍。
道士守玄牝，龍虎看舒卷。
我老安能爲，萬劫付一喘。
默坐閱塵界，往來八十反。
區區我所寄，蹙縮蠶在蠶。
適從海上回，蓬萊又清淺。

鬱孤臺再過虔州和前韻

吾生如寄耳，嶺海亦閑游。
贛石三百里，寒江尺五流。
楚山微有霞，越瘴久無秋。
望斷橫雲嶠，魂飛咤雪洲。
曉鐘時出寺，暮鼓各鳴樓。
歸路迷千嶂，勞生閱百州。
不隨猿鶴化，甘作賈胡留。
祇有貂裘在，猶堪買釣舟。

虔守霍大夫監郡許朝奉見和此詩復次前韻

大邦安靜治，小院得閑游。
贛水雨已漲，廉泉春水流。
同烹貢茗雪，一洗瘴茅秋。
秋思生尊餚，寒衣待橘洲。
揚雄未有宅，王粲且登樓。
老境無多日，歸心夢幾州。
敢因逃酒去，端爲和詩留。
舊篋藏新語，清風自滿舟。

贈虔州術士謝君

屬國新從海外歸，君平且莫下簾帷。
前生恐是廬行者，後學過呼韓。
退之死後人傳戒定慧，生時宿直斗牛箕。
憑君爲算行年看，便數生時到死時。

虔州景德寺榮師湛然堂

卓然精明念不起，兀然灰槁照不滅。
方定之時慧在定，定慧寂照非兩法。
妙湛總持不動尊，默然真入不二門。
語息則默非對語，此話要將周易論。
諸方人人把雷電，不容細看眞頭面。
欲知妙湛與總持，更問江東三語椽。

和陽行先用鬱孤臺韻

室空惟法喜，心定有天游。
摩詰元無病，須洹不入流。
苦嫌尋直枉，坐待寸田秋。
雖未麒麟閣，已逃鸚鵡洲。
酒醒風動竹，夢斷月窺樓。
衆謂元德秀，自稱陽道州。
拔葵終相魯，辟穀會封留。
用舍俱無礙，飄然不繫舟。

用數珠韻贈湜長老

嗣宗雖不言，叔寶猶理遺。
東坡但熟睡，一夕一展轉。
南遷昔虞翻，却掃今馮衍。
古佛旣手提，諸方皆席卷。
當年清隱老，鶴瘦歸不喘。
和我彈丸詩，百發亦百反。
耆年日凋喪，但有犧角璽。
時來窺方丈，共笑虎毛淺。

和猶子遲贈孫志舉

軒裳大爐韞陶冶一世人從衡落模範誰復甘飢貧可憐方回癡初不疑嘉賓頗念懷祖黠瞋兒與兵姻失身墮浩渺投老無涯垠回看十年舊誰似數子真孫郎表獨立霜戟交重闈深居小汝覲豈問親與隣連枝皆秀傑英氣推伯仁我從海外歸喜及崆峒春新年得異書西郭有逸民陽行先以登真隱訣見借小孫又過我歡若平生親清詩五百言句句皆絕倫養火雖未伏要是丹砂銀我家六男子朴學非時新詩詞各璀璨老語徒周諄頤言敦夙好永與竹林均六子豈可忘從我屢厄陳

南禪長老和詩不已故作六蟲篇答之

鳳凰覽德輝遠引不待遣鷓鴣戀庭宇倏忽來千轉那將坐井蛙而比談天衍蠹魚著文字槁死猶遭卷老牛疲耕作見月亦妄喘東坡方三問南禪已五反老人但目擊侍者應足蠻最後六蟲篇深寄恨語淺明日南禪和詩不到故重賦數珠篇以督之二首

未來不可招已過那容遣中間見在心一一風輪轉自從一生二巧歷莫能衍不如袖手坐六用都懷卷風雷生警欸萬竅自號喘詩人思無邪孟子內自反大珠分一月細綆合兩蠻纍然挂禪牀妙用夫豈淺朝來取飯化乃是維摩遣全鋒雖未露半藏已曾轉說有陋裴顧談無笑王衍看經聊爾耳遮眼初不卷三咤故自醒一映何由喘請歸視故續靜夜珠當反安居三十年古衲磨山蠻持珠尚默坐豈是功用淺

用前韻再和霍大夫

文字先生飲謂劉執中江山清獻游典刑傳父老尊俎繼風流度嶺逢梅雨還家指麥秋自慚鴻鴈侶爭

集稻梁洲野闊橫雙練城堅聳百樓行看鳳尾詔却下虎頭州君意已吳越我行無去留歸塗應食粥乞米使君舟

用前韻再和許朝奉

高門元世舊客路曉追游清絕聞詩語疎通豈法流傳家有衣鉢斷獄盡春秋邂逅陪車馬尋芳謝眺洲淒涼望鄉國得句仲宣樓恨賦投湘水悲歌祀柳州何如五字律相與一樽留更約登塵外歸時月滿舟

用前韻再和孫志舉

人定者勝天天定亦勝人鄧通豈不富郭解安得貧驚飛賀廈驚走散入幕賓醉眠中山酒夢結南柯姻寵辱能幾何悲歡浩無垠回視人間世了無一事真洒掃古玉局香火通帝闕我室思無邪我堂德有隣所至爲鄉里事賢友其仁之子富經術蔚如井火春婉蟻楚南極淑氣生此民唱高和自寡非我誰當親譬彼嶰谷竹翦裁侍伶倫俗學吁可鄙紙繪配芻銀聊將調癡鬼亦復爭華新願子事篤實浮言掃譖諱窮通付造物得喪理本均期子如太倉會當發陳陳

崔文學申攜文見過蕭然有出塵之姿問之則孫介夫之甥也故復用前韻賦一篇示志舉

象服盛簪珥豈是邢夫人弊衣破冠履可憐范叔貧君看崔員外晚就觀國賓當年頗赫赫翁媼爭爲姻事見退之贈崔員外詩蹭蹬阻風水橫斜挂邊垠青衫映白髮今似梅子真道存百無害甘守吳市闥自言總角歲慈母爲擇鄰邦人驚似舅矯矯惡不仁詩文非他師家法乃富春豈非空同秀爲國產雋民挺然齊魯生近出姬姜親爲文不在多一頌了伯倫清詩要鍛鍊乃得鉉中銀自我遷嶺外七見槐火新箸

書已絕筆。一默含千諱。賓樽和葦簾。天節非人均。時時自娛嬉。豈爲俗子陳。

畫車詩二首

何人畫此隻輪車。便是當年欹器圖。上易下難須審細。左提右挈免疎虞。九衢歌舞頌主明。誰憫寒泉獨自清。賴有千車能散福。化爲膏雨滿重城。

虔州呂倚承奉年八十三讀書作詩不已好收古今帖貧甚至食不足。

揚雄老無子。馮衍終不遇。不識孔方兄。但有靈照女。家藏古今帖。墨色照箱筥。飢來據空案。一字不堪煮。枯腸五千卷。磊落相撑拄。吟爲蜩蛩聲。時有島可句。爲語里長者。德齒敬已古。如翁有幾人。薄少可時助。王子直去歲送子。由北歸往反。百舍今又相逢。贛上戲用舊韻作詩留別。

米盡無人典破裘。送行萬里一鄒游。解舟又欲攜君去。歸舍聊須與婦謀。聞道年來丹伏火。不愁老去雪蒙頭。剩買山田添鶴口。廟堂新拜富民侯。

次韻江晦叔二首

人老家何在。龍眠雨未驚。酒船回太白。檣子候淵明。幸與登仙郭。同依坐嘯成。小樓看月上。劇飲到參橫。鐘鼓江南岸。歸來夢自驚。浮雲世事改。孤月此心明。雨已傾盆落。詩仍翻水成。二江爭送客。木杪看橋橫。

次韻江晦叔兼呈器之

橫空初不跨鵬鷁。但覺胡牀步步高。器之言嘗夢飛。自覺身與所坐牀皆起空中。一枕晝眠春有夢。扁舟夜渡海無濤。歸來又見顚茶陸。多病仍逢止酒陶。笑說南荒底處所。祇今榕葉下亭臯。

寒食與器之游南塔寺寂照堂

城南鐘鼓鬪清新。端爲投荒洗瘴塵。總是鏡空堂上客。誰爲寂照鏡中人。紅英掃地風驚曉。綠葉成陰雨洗春。記取明年作寒食。杏花曾與此翁鄰。

器之好談禪。不喜游山。山中筍出戲語器之可同參玉板長老作此詩

叢林真百丈。法嗣有橫枝。玉板橫枝竹笋也。不怕石頭路。來參玉板師。聊憑柏樹子。與問籜龍兒。瓦礫猶能說。此君那不知。

永和清都觀謝道士童顏鬚髮問其年生於丙子蓋與予同求此詩

鏡湖勑賜老江東。未似西歸玉局翁。羈枕未容春夢斷。青都宛在默存中。每逢佳境攜兒去。試問流年與我同。自笑餘生消底物。半篙清漲百灘空。予與劉器之同發虔州。江水忽清漲丈餘。輶右三百里。無一見者。至永和器之解舟先去。予獨游清都。作此詩。

贈詩僧道通

雄豪而妙苦而腴。祇有琴聰與蜜殊。錢塘僧思聰。總角善琴。後捨琴而學詩。復棄詩而學道。其詩似皎然而加雄放。安州僧仲殊。詩敏捷立成。而工妙絕人遠甚。殊僻穀常啖蜜。語帶煙霞。從古少李太白云。他人之文。如山無煙霞。春無草木。氣含蔬筍。到公無謂無酸餡氣也。香村乍喜聞蘋葛。古井惟愁斷轆轤。爲報韓公莫輕許。從今島可是詩奴。

君家四壁如相如。卷藏天祿吞石渠。豈惟鄴侯三萬軸。家有世南行祕書。兒童拍手笑何事。笑人空腹談經義。未許中郎得異書。且共揚雄說奇字。清江繁山碧玉環。下有老龍千古閑。知君好事家有酒。化爲老人夜扣關。留侯之孫書滿腹。玉函寶方何用讀。濠梁空復五車多。圯上從來一篇足。

劉壯輿長官是是堂

間燕言仁義是非安可無。非非義之屬。是是仁之徒。非非近乎訛。是是近乎諛。當爲感麟翁。善惡分鑷銖。抑爲阮嗣宗。臧否兩含糊。劉君有家學。三世道益孤。陳古以刺今。紳史行天誅。皎如大明鏡。百陋逢一殊。鶴立時四顧。何由擾羣狐。作堂名是是。自說行坦途。孜孜稱善人。不善自遠徂。願君置坐右。此語禹所謨。予昔作壺中九華詩。其後八年復過湖口。則石已爲好事者取去。乃和前韻以自解云。

江邊陣馬走千峯。問訊方知冀北空。尤物已隨清夢斷。劉夢得以九華爲造物。一尤物。眞形猶在畫圖中。道藏有五嶽真形圖。歸來晚歲同元亮。却掃何人伴敬通。賴有銅盆修石供。仇池玉色自瓊瑤。家有銅盆。貯仇池石。正綠色。有洞水達背。予又嘗以怪石供佛印師。作怪石供一篇。

次韻郭功甫二首

蚤知臭腐卽神奇。海北天南總是歸。九萬里風安稅駕。雲鵬今悔不卑飛。可憐倦鳥不知時。空羨騎鯨得所歸。玉局西南天一角。萬人沙苑看孤飛。

次韻法芝舉舊詩

春來何處不歸鴻。非復羸牛踏舊蹤。但願老師真似月。誰家甕裏不相逢。

次舊韻贈清涼長老

過淮入洛地多塵，舉扇西風欲汙人。
但怪雲山不改色，豈知江月解分身。
安心有道年顏好，遇物無情句法新。
送我長蘆舟一葉，笑看雪浪滿衣巾。

睡起聞米元章到東園送麥門冬飲子

一枕清風直萬錢，無人肯買此牕眠。
開心暖胃門冬飲，知是東坡手自煎。

夢中作寄朱行中

舜不作六器，誰知貴與璠。
哀哉楚狂士，抱璞號空山。
相如起睨柱，頭壁相與還。
何如鄭子產，有禮國自閑。
雖微韓宣子，鄙夫亦懷環。
至今不貪寶，凜然照塵寰。

答徑山琳長老

與君皆丙子，各已三萬日。
一日一千偈，電往那容詰。
大患緣有身，無身則無疾。
平生笑羅付，神咒真浪出。

